



ИОАННЛЭСЬ ЗЕЧ ИВОР

1-тй ЛЮКЕТ

¹Кутсконаз ик Кыл вылэм. Кыл Инмар дорын вылэм. Кыл Инмар вылэм. ²Со кутсконаз ик Инмар дорын вылэм. ³Мар кылдыны кутскем, ваньмыз Со пыр кылдыны кутскем, Сотэк номыр но кылдыны кутскымтэ. ⁴Со бордын улон, улон адямиослэн югытсы луэ. ⁵Югыт пеймытын пиштыса улэ, пеймыт сое жокатыны уг быгаты.

⁶Инмарлэн лэзем адямиез вылэм: солэн нимыз Иоанн. ⁷Со пыр ваньмыз мед оскозы шуыса, со шара ивортыны лыктэм, Югыт сярысь ивортыны. ⁸Со таиз югыт вылымтэ, но ыстэмын вылэм Югыт сярысь шара ивортыны. ⁹Вылэм зэмос Югыт, Кудйз дуннее лыктэ но котькудзэ адямиез югдытэ. ¹⁰Дуннеын вылэм, дунне Со пыр кылдыны кутскем, дунне Сое тодмамтэ. ¹¹Аслазъёс доры лык-

тэм, но аслазъёсыз Сое кулэ кариллямтэ. ¹²Нош ваньмыз, кинъёс Сое кабыл басьтйллям, Солэн нимызлы оскисьёслы, Инмар нылпиос луыны кужым сётэм. ¹³Соос вирлэсь өвёл, мугорлэн кулэ каремезлэсь өвёл, пиосмуртлэн кулэ каремезлэсь өвёл, – соос Инмарлэсь вордйськиллям.

¹⁴Кыл мугоро луэм, дэлетэн но зэмлыкен тыр луыса, милемын валче улйз. Ми Солэсь пиштйсь данлыксэ адзимы, Атайлэсь огназ вордйськем Пиезлэсь пиштйсь данлыксэ. ¹⁵Иоанн Со сярись шара ивортэм но бадзым куараен верам: «Таиз Со вал, Кудйз сярись мон шуи: ”Мон бёрсы Лыктйсь мынам азам луиз, малы ке шуоно, мынэстым азьлон вал”». ¹⁶Солэн тыр луэмысьтыз, ми ваньнамы дэлет вылэ дэлет басьтймы. ¹⁷Закон Моисей пыр сётэмын, нош дэлет но зэмлык Иисус Христос пыр луэмын. ¹⁸Инмарез нокин но, ноку но адзымтэ; Атаезлэн пушказ улыса, одйгназ гинэ вордйськем Пи, Со возматйз-тодытйз.

¹⁹Тани Иоаннлэн шара ивортэмез: кукке иудейёс Иерусалимысь священникъёсты но левитъёсты солэсь юаны ыстйллям: «Кин тон?», ²⁰со ялэм, палэнтйськымтэ, мон Христос өвёл, шуыса ялэм. ²¹Но солэсь юаллям: «Мар бен? Тон Илия-а?» Со шуэм: «Өвёл». – «Пророк?» Со шуэм: «Өвёл». ²²Солы шуиллям: «Кин-о бен тон? Милемыз ыстйсьёслы ответ сётон понна, мар вералод тон ас сярисьтыд?» ²³Со шуэм:

«Мон кыр дуннеын кесиськисьлэн куараез:

”Кузё-Инмарлы сюресэз шонертелэ”,

кызыы Исаия пророк вераз».* ²⁴Ыстэм муртъёс фарисейёс пöлысь выйлллям ²⁵но солэсь юаллям: «Христос но, Илия но, пророк но тон öвöл ке, малы тон пылатйськод?» ²⁶Иоанн соослы ответ сётыса шуэм: «Мон вуын пылатйсько; но тй пöлын сылэ Со, Кудзэ тй уд тодйське. ²⁷Со мон бöрсьын лыктйсь, Со мынам азьпалам луиз. Солэн пыд-кутчанэзлэсь езе пертчыны но мон уг сылйськы». ²⁸Та уж ортчем Иоаннлэн пылатон интыяз, Иордан вöзысь Вифавараын.

²⁹Мукетаз нуналэ Иоанн ас дораз лыктйсь Иисусэз адзем но шуэм: «Тани Инмарлэн Ыжпиез*, Со Ас вылаз дуннелэсь сьöлыксэ басьтэ. ³⁰Та – Со, Кудйз сярысь мон верай: ”Мон бöрсьы Пимурт лыктэ. Со мынам азьпалам луиз, малы ке шуоно, Со мынэсьтым азьвыл вал”. ³¹Мон Сое öй тоды; Со Израильлы тодмо мед луоз шуыса, мон вуын пылатыны лыктй». ³²Иоанн шара ивортэм: «Инмысен Духлэсь дыдык выллем васькемзэ но Со вылын кыллемзэ адзи. ³³Мон Сое öй тоды; нош монэ вуын пылатыны Ыстйсь мыным шуиз: ”Кин былэ Духлэсь васькемзэ но Со вылын улэмзэ адзид ке, Со ик луэ Святой Духен пылатйсь”. ³⁴Мон адзи но, Та Инмар Пи луэ шуыса, шара ивортй».

³⁵Мукет нуналэ Иоанн нош ик отын сылэм аслаз кык дышетскисьёсыныз. ³⁶Та палтй ортчйсь Иисусэз адзыса шуэм: «Тани Инмарлэн Ыжпиез». ³⁷Со-

* 1:23 Ис. 40:3.

* 1:29 Черк-славян кылын *агнец*; берыктэмын грек кылысь: *амнос* ”ьжи”.

лэсь та кыльёссэ кылыса, кыкез но дышетскись-ёсыз Иисус сьöры кошкиллям. ³⁸Иисус берытскем но, со лыктисьёсты адзыса, соослы шуэм: «Мар тйледлы кулэ?» Соос Солы шуиллям: «Равви, – кудйз ”дышетйсь” шуэм луэ, – кытын улйськод?» ³⁹Соослы шуэм: «Ойдолэ, адзоды». Соос мынйллям но адзиллям, кытын Со улэ, со нуналэз Со дорын ортчыллям. Ог дас* час котыр вылэм. ⁴⁰Иоаннлэсь Иисус сярись верамзэ кылэмьёс но Со сьöры кык ёошен мынйсьёс пöлысь одйгез Симон Петрлэн Андрей выныз вылэм. ⁴¹Ваньмызлэсь азыло со утчаса шедьтэм аслэсьтыз Симон агайзэ но солы верам: «Ми Мессияез шедьтймы, кудйз ”Христос” шуэм луэ». ⁴²Сое Иисус доры ваем. Иисус со шоры учкем но шуэм: «Тон – Симон, Ионалэн пиез; тон Кифа шуыса нимаськод, кудйз ”из” (Петр) шуэм луэ».

⁴³Мукетаз нунал Иисус Галилеяе мыноно кариськем. Филиппез шедьтэм но солы шуэм: «Мон сьöры мын». ⁴⁴Филипп Вифсаидаысь вылэм, Андреен но Петрен одйг городысь. ⁴⁵Филипп Нафанаилэз шедьтэм но солы шуэм: «Ми шедьтймы Сое, Кин сярись Моисей законын но пророкьёс гождьязы – Назаретысь Иосифлэсь пизэ, Иисусэз». ⁴⁶Нош Нафанаил солы шуэм: «Назаретысь марке но жечез луыны быгатоз-а?» Филипп солы шуэм: «Мын но учкы». ⁴⁷Со доры лыктйсь Нафанаилэз адзем но Иисус со сярись шуэм: «Тани зэмос Израиль адями, кудйзлэн кескич сямыз öвöл».

* 1:39 Туала дырын ог 4 час, нуназе бере.

⁴⁸Нафанаил Солы шуэм: «Кызьы Тон монэ то-
дйськод?» Иисус солы ответ сётыса шуэм: «Тонэ
Филипп өтемлэсь азьло ик, смоквапу улысен Мон
тонэ адзи». ⁴⁹Нафанаил Солы ответ сётэм: «Равви!
Тон – Инмар Пи, Тон – Израильлэн Эксээз». ⁵⁰Ии-
сус солы ответ сётыса шуэм: «Тон соин оскиськод,
малы ке шуоно, Мон тыныд шуи: ”Мон тонэ смок-
вапу улысь адзи”; талэсь бадзымзэ адзод». ⁵¹Иисус
солы шуэм: «Зэм ик, зэм ик тйледлы верасько:
табере Инлэсь усьтйськемзэ но Аядми Пи доры
лэзиськись, жутйськись Инмар кылчинъёсты адзо-
ды».

2-тй ЛЮКЕТ

¹Куинетй нуналаз Галилеяысь Кана карын сюан
луэм. Иисуслэн Анаез но отын вылэм. ²Сюанэ Ии-
сус но, Солэн дышеткисьёсыз но өтемын вылэм.
³Виназы тырмымтэысь, Иисуслэн Анаез Солы шу-
эм: «Виназы өвёл ни». ⁴Иисус солы шуэм: «Кыш-
номурт! Мыным но, Тыныд но маке шат? Өз на
вуы Мынам часэ». ⁵Анаез медоослы шуэм: «Со
тйледлы мар вераз ке, сое лэсьтэ». ⁶Иудейёслы
чылкытатйськон сямзэс ортчытон понна, татын
излэсь лэсьтэм куать ву тыронзы вылэм, отчы
кык яке куинь мера* ву тэре вылэм. ⁷Иисус соослы
шуэм: «Ву тыронъёсты вуэн тырмытэ». Йылояз
соосты тырмытйллям. ⁸Соослы шуэм: «Табере

* 2:6 Одыг мерае ог 40 литр тэре.

омыртэ но сюанлэн төроезлы нуэ». Нуиллям. ⁹Виналы пөрмем вуэз төро верьям бере, – нош со уг тоды вылэм, кытысь та вина, ву омырьясь медоос гинэ тодо вылэм, – соку төро эмеспиез өтем ¹⁰но солы шуэм: «Котькудйз адями нырысь зеч виназэ удэ, нош кукке кудзо, соку лябзэ; нош тон зеч винадэ татчыозь воземед». ¹¹Тазы Галилеяын Кана карысен Иисус паймымон ужьёсызлы кутскон сётэм, возматэм Аслэсьтыз пиштйсь данлыксэ; дышетскисьёсыз Солы оскиллям.

¹²Та бере Со лыктэм Капернауме, Соин чош Анаез но, братьёсыз но, дышетскисьёсыз но; отын көня ке но нунал улйллям.

¹³Матэ вуэ вылэм иудейёслэн Быдзымнунал празниксы; Иисус Иерусалиме лыктэм. ¹⁴Адзем, кызы храмын ошъёсты, ыжъёсты, дыдыкъёсты вузаса улйллям, отын коньдон вошьясьёс пукиллям. ¹⁵Гозыосты сюло пуныса, ваньзэс храмысь уллям, озы ик ыжъёсты но ошъёсты, коньдон вошьясьёслэсь уксёзэс пазьгем, жөкъёссэс кымалтэм; ¹⁶дыдык вузасьёслы шуэм: «Тае татысь бастэ, Атаелэсь корказэ вузкарон корка эн каре». ¹⁷Соку дышетскисьёсыз тодазы ваиллям тазы гожтйськемез: «Тынад коркаед понна тыршон Монэ курадзйтэ». ¹⁸Та пумысен, Иисуслы ответ сётыса, иудейёс шуиллям: «Тазы лэсьтыны эрик ваньдэ кыче тодметэн Тон милемлы возматод?» ¹⁹Иисус соослы ответ сётыса шуэм: «Куашкатэ та храмез, нош Мон куинь нунал куспын сое жуто». ²⁰Та пумысен иудейёс шуиллям: «Та храм ньыльдон куать ар чоже лэсьтйськиз, нош Тон сое куинь

нунал куспын жутод?» ²¹Нош Со Ас Мугорызлэн храмез сярысь вера вылэм. ²²Со кулэмысь улзыса султэм бере, дышетскисьёсыз тодазы ваиллям Солэсь тае верамзэ. Гожтэмлы но, Иисуслэн верам кылызлы но оскиллям.

²³Быдзымнунал дырря Иерусалимын тросэз, Солэсь паймымон ужъёс лэсьтэмзэ адзыса, Солы оскиллям. ²⁴Нош Ачиз Иисус соослы оскытскымтэ, малы ке шуоно, соосты ваньзэс тодэ вылэм. ²⁵Муртлэсь мурт сярысь шара ивортэмзэ кулэ карымтэ; уго Ачиз тодэ вылэм мар вань адямилэн пушказ.

3-тй ЛЮКЕТ

¹Фарисейёс пöлын, иудейёслэн Никодим нимо одйг кузёйырзы вылэм. ²Со уин Иисус доры лыктэм но шуэм: «Равви! Ми тодйськомы, Тон Инмар дорысь лыктэм Дышетйсь луиськод шуыса. Уго таёе паймымон ужъёсты, кудъёссэ Тон лэсьтйськод, нокин но лэсьтыны уг быгаты, соин ёош Инмар өз ке луы». ³Иисус солы ответ сётыса шуэм: «Зэм ик, зэм ик тыныд верасько: кин вылйысен өз ке вордйськы, Инмар Эксэйлыкез адзыны уз быгаты». ⁴Никодим Солы шуэм: «Пересь луыса но, кызы аями быгатэ выльысен вордйськыны? Оло быгатэ со анаезлэн пушказ выльысен пырыны но вордйськыны?» ⁵Иисус ответ сётэм: «Зэм ик, зэм ик тыныд верасько: кин вулэсь но Духлэсь өз ке вордйськы, со уг быгаты Инмар Эксэйлыке

пырыны. ⁶Лулмугорлэсь вордйськемез лулмугор луэ, нош Духлэсь вордйськемез, дух луэ. ⁷Эн паймы Мынам тыныд верамелы: тй выльысен вордйськыны кулэ. ⁸Төл пельтэ отын, кытын потэ пельтэмез, куаразэ но солэсь кылйськод, нош кытысь лыктэмзэ но кытчы мынэмзэ уд тодйськы: озьы ик луэ котькудйзлэн Духлэсь вордйськемезлэн». ⁹Солы ответ сётыса, Никодим шуэм: «Кызы озьы луыны быгатоз?» ¹⁰Иисус ответ сётэм но солы шуэм: «Тон – Израильлэн дышетйсез, тае-а уд тодйськы? ¹¹Зэм ик, зэм ик тыныд верасько: Ми вераськомы со сярысь, мае тодйськомы, но шара ивортйськомы со сярысь, мае адзимы, нош тй Милесьтым ивортэммес кулэ уд кариське. ¹²Мон тйледлы музьем вылысез сярысь верай, но тй уд оскиське, кызы оскоды, Инмысез сярысь тйледлы верай ке? ¹³Инмын улйсь, Инмысь васькем Аядми Пи сяна, Инме нокин но өз туба. ¹⁴Кызы кыр дуннеысен Моисей кыез жутэм, озьы ик жутйськемын луыны кулэ Аядми Пи но. ¹⁵Нокин но Солы оскись мурт медаз быры, солэн быронтэм улонэз мед луоз. ¹⁶Инмар сокем дуннеез яратйз, Аслэсьтыз одйг вордйськем Пизэ сётйз, котькудйз но Солы оскись мурт медаз быры, солэн быронтэм улонэз мед луоз шуыса. ¹⁷Уго Инмар Аслэсьтыз Пизэ дуннее дуннеез судить карыны өз лэзы. Со пыр дунне мед утиськоз шуыса Сое дунне вылэ лэзиз. ¹⁸Солы оскись мурт судэ уг сюры, нош оскымтэ мурт судэ сюремын ни, малы ке шуоно, Инмарлэн огназ вордйськем Пиезлы өз оскы. ¹⁹Судлэн таҗе пушт-

росээз луэ: дунне вылтэ югыт лыктйз; нош адямиос югытээ сярись юнгес пеймытээ яратйзы, малы ке шуоно, соослэн ужъёссы уродэсь вал. ²⁰Котькудйз но уродээ лэсьтйсь югытээ адзонтэм каре но, солэн ужъёсыз шарае медаз потэ шуыса, югыт доры уг мыны, малы ке шуоно, солэн ужъёсыз уродэсь. ²¹Нош зэмлыкъя улйсь мурт, солэн ужъёсыз шара мед адзиськозы шуыса, югыт пала мынэ, малы ке шуоно, соос Инмарлэн эрикезъя лэсьтэмын».

²²Та бере Иисус Аслаз дышетскисьёсыныз Иудея музьеме лыктэм. Соосын валче отын Со улэм, пылатэм. ²³Нош Иоанн со дыре пылатэм Салим вёзысь Енонын, – отын трос вуээ вылэм; отчы мыныса пылатйськиллям. ²⁴Иоанн пытсэтэ ворсамын вылымтэ на уго. ²⁵Соку Иоаннлэн дышетекисьёсыз но иудейёс куспын чылкытатйськон ласянь ченгешон потэм; ²⁶Иоанн доры лыктйллям но солы шуиллям: «Равви! Со, Кудйз тонэн огазын Иордан вёзын вал, Кудйз сярись тон шара ивортйд, тани Со но пылатэ, вань калык Со доры мынэ». ²⁷Иоанн ответ сётыса шуэм: «Инмысен өз ке сётйськы, адямилэн номыр но ас вылаз басьтэ-мез уг луы. ²⁸Тй асьтэос мынам адзисьёсы, кукемон шуи: "Мон Христос өвёл, но мон Солэн азьпалаз ыстэмын". ²⁹Кинлэн ичименез* вань, со эмеспи; нош эмеспилэн сое кылзйськыса сыйсь эшез, эмеспилэсь куаразэ кылыса туж шумпотэ:

* 3:29 Выль кен; невеста.

тани таиз мынам шумпотонэ быдэсмиз. ³⁰Солы будыны кулэ, нош мыным – покчиёмыны.

³¹Вылйысен лыктйсь ваньмызлэсь вылй луэ; нош музъемлэсез музъемлэсь ик вань, музъемлэсь луэм кадь ик вера но. Инмысь Лыктйсь ваньмызлэсь вылй луэ. ³²Мае Со адзиз но кылйз, со сярись ик шара ивортэ, нош нокин но Солэсь ивортэмзэ кулэ уг кары. ³³Солэсь ивортэмзэ кабыл басытэм мурт таин юнматэ, Инмар зэмлык луэ шуыса. ³⁴Инмарлэн Ыстэмез, Инмар кыльёсты вера; уго Инмар Духез мертаса уг сёты. ³⁵Атай Пизэ яратэ, ваньзэ Солэн кияз сётйз. ³⁶Пилы оскись муртлэн быронтэм улонэз вань; нош Пилы оскисьтэм мурт улонэз уз адзы. Инмарлэн вожпотонэз со вылын улэ».

4-тй ЛЮКЕТ

¹Куке Иисус тодэм фарисейёс доры вуэм верась-конэз, Со, пе, Иоанн сярись трогес дышетскисьёсты котыраз люка но пылатэ, – ²Иисус Ачиз пылатылымтэ ке но, Солэн дышетскисьёсыз пылатйллям, – ³Иудеяысь кошкем но, нош ик Галилеяе мынэм. ⁴Солы ортчоно вылэм Самария пыр. ⁵Озыы Со вуэм Самариясь Сихарь шуон каре, кудйз матын луэ Иаковлэн Иосиф пиезлы сётэм ана музъемезлы; ⁶отын Иаковлэн гудземез вылэм. Сюрес вылын жадьыса, Иисус гудзем дуре пуксем; ог куать час котыр вылэм.

⁷Самарияысь кышномурт ву омыртыны лыктэм. Иисус солы шуэм: «Вай Мыным юыны». ⁸Дышетекисьёсыз сиён басьтыны городэ кошкемын вылэм. ⁹Самария кышномурт Солы шуэм: «Иудей луыса вылысь, кызьы Тон мынэсьтым, Самария кышномуртлэсь, юыны куриськод?» Иудейёс Самария калыкен кусып уг возё ук. ¹⁰Иисус солы ответ сётыса шуэм: «Инмар кузьымез тон тодысалыд ке, но Кин тыныд вера: "Вай Мыным юыны", тон ачид Солэсь курысалыд, нош Со тыныд улэп ву сётысал». ¹¹Кышномурт Солы шуэм: «Кузё! Тыныд омыртыны но номырин, нош гудзем муркытысь бен Тынад улэп вуэд? ¹²Оло Тон Иаков атаймылэсь бадзымгес, кудйз та гудземез милемлы сётйз, отысь ачиз но юиз, нылпиосыз но, пудоез но?» ¹³Иисус солы ответ сётыса шуэм: «Коткинлэн но та вуэз юись муртлэн нош ик сюэз куасьмоз. ¹⁴Нош кин Мынэсьтым сётэм вуме юиз ке, солэн ноку но сюэз уз ни куасьмы; Мынам солы сётэм вуэ со пушкын ошмеслы пөрмоз, кудйзлэн вуэз быронтэм улонэ бызе». ¹⁵Кышномурт Солы шуэм: «Кузё! Вай мыным со вуэз, сюэ но медаз ни куасьмы, ву омыръяны но татчы медам ни ветлы».

¹⁶Иисус солы шуэм: «Мын, кузпалдэ оть но татчы лыкты». ¹⁷Кышномурт ответ сётыса шуэм: «Мынам кузпалы өвёл». Иисус солы шуэм: «Зэм тон верад, кузпалыд өвёл шуыса; ¹⁸уго тынад вить картэд вал, нош али кудйз вань, со тыныд карт өвёл; тае тон шонер верад». ¹⁹Кышномурт Солы шуэм: «Кузё! Адзисько: Тон пророк. ²⁰Милям

атайёсмы та гурезьын йыбыртъязы, нош тй йыбыртъяны ярано инты Иерусалимын луэ шуись-коды». ²¹Иисус солы шуэм: «Оскы мыным: вуэ дыр, – та гурезьын но, Иерусалимын но Атайлы уд йыбыртъялэ. ²²Тй уд тодйське кинлы йыбыртъямдэс, нош ми тодйськомы кинлы йыбыртъям-мес, уго утиськон иудейёс бордысь. ²³Но вуоз дыр, вуэмын но ни, – зэмос йыбыртъясьёс духен но зэмлыкен Атайлы йыбыртъялозы, уго сыче йыбыртъясьёсты Атай Аслыз утча: ²⁴Инмар – со дух. Солы йыбыртъясьёс духен но зэмлыкен йыбыртъяны кулэ». ²⁵Кышномурт Солы шуэм: «Тодйсько, Мессия, мукет сямен вераса, Христос, лыктоз шуыса. Со лыктйз ке, соку ваньзэ милемлы ивортоз». ²⁶Иисус солы шуэм: «Тонэн Вераськись – со Мон».

²⁷Со дыре дышетскисьёсыз вуиллям но Иисуслэн кышномуртэн вераськемезлы паймиллям. Но одйгзы но шуиллямтэ: «Мар Тыныд солэсь кулэ?» яке: «Мар сярысь соин вераськиськод?» ²⁸Соку кышномурт ву нуллонзэ кельтэм, городэ мынэм но адямиослы верам: ²⁹«Мынэлэ, учкелэ Адямиез, Кудйз мыным ваньзэ вераз, мар мон лэсьтй. Со Христос овёл меда?» ³⁰Соос городысь потйллям но Со доры мынйллям.

³¹Со куспын дышетскисьёсыз Сое «Равви! Си!» шуыса куриллям. ³²Нош. Иисус соослы шуэм: «Мынам вань сиёнэ, кудзэ тй уд тодйське». ³³Соин сэрен дышетскисьёсыз куспазы вераськиллям: «Оло Солы сиён кин ке но ваиз-а?» ³⁴Иисус соослы шуэм: «Мынам сиёнэ – Монэ Ыстйсьлэсь эриксэ

карон но Солэсь ужзэ быдэстон. ³⁵Эшшо ньыль толэзь, собере аран дыр вуоз шуыса тй уд вераське-а? Нош Мон тйледлы верасько: асьтэлэсь синъ-ёстэс жутэ но ю бусы шоры учке: кыче со тōды луэм, араны вуэм ини. ³⁶Арась мурт ужам дунзэ басьтэ но быронтэм улонэ емыш бича, озьыен, кизись но, арась но валче шумпотозы. ³⁷”Одйгез кизе, нош мукетыз ара” шуыса веран кыл шонер луэ. ³⁸Мар бордын тй өд тырше, сое араны Мон тйледыз ыстй. Мукетъёс тыршизы, нош тй соослэн ужаменызы пайда басьтйськоды».

³⁹Кышномуртлэн тазы шары ивортэм бераз: «Со вераз мыным ваньзэ, мае мон лэсьтй», та городысь трос Самария муртъёс Солы оскыны кутскиллям. ⁴⁰Соин ик Самария муртъёс, Иисус дорылыктыса, Сое куриллям соос дорын мед улоз шуыса. Отын Со кык нунал улэм. ⁴¹Солэн вераськем бераз эшшо но трос мурт оскыны кутскем, ⁴²нош со кышномуртлы шуиллям: «Табере тынад кылыдъя гинэ ум оскиське, уго асьмеос кылймы но тодймы, Со дуннелэн зэмос Утисез, Христос шуыса».

⁴³Кык нунал ортчыса, Со отысь кошкем, Галилеяе мынэм. ⁴⁴Иисус шары ивортэм, аслаз вордскем музеймаз пророклэн сйез-санэз уг луы шуыса. ⁴⁵Галилеяе вуэм бераз, праздник дыръя Солэсь Иерусалимын вань лэсьтэмзэ адзыса, – уго соос но празднике ветлйллям, – Галилея муртъёс Сое жеч пумиталлям.

⁴⁶Озы, Иисус нош ик вуэм Галилеяысь Кана каре, кытын вуэз виналы пōрмытйз вал. Капер-

наумын вылэм эксэй юртысь одйгез кузёйыр, солэн пиез висе вылэм. ⁴⁷Иудеяысь Галилеяе Иисуслэсь лыктэмзэ кылэм но, Со доры мыныса, дораз лыктыны но пизэ бурмытыны курем. Со кулоно кадь ик вылэм ини. ⁴⁸Иисус солы шуэм: «Паймымон ужъёсты, тодметъёсты од ке адже, тй уд оске». ⁴⁹Эксэй юртысь кузёйыр Солы шуэм: «Кузёе! Пие кулымтэ на дыръя, лыкты». ⁵⁰Иисус солы шуэм: «Мын, тынад пиед бурмемын ни». Иисуслэн верам кылызлы оскыса, Со кошкем. ⁵¹Сюрес вылысен сое медоосыз пумиталлям но шуиллям: «Тынад пиед бурмемын». ⁵²Соослэсь со юам: «Көнжетй часын солы капчигес луиз?» Солы шуиллям: «Толон сизьыметй часын солэн поськылез быриз». ⁵³Татысен атаез тодэм: та вылэм Иисуслэн ”тынад пиед бурмемын ни” шуэм часэз. Озы ачиз но, солэн быдэс юртэз но оскыны кутскем. ⁵⁴Тазэ кыкетйзэ паймымон ужзэ Иисус лэсьтэм, Иудеяысь Галилеяе берытскем бераз.

5-тй ЛЮКЕТ

¹Та бере иудейёслэн празниксы вылэм. Иисус Иерусалиме лыктэм. ²Иерусалимын Ыжкапка дорын вылэм еврей сямен Вифезда шуыса нимаськись пылатскон инты, солэн липем вить пыранпотанэз вылэм. ³Отын туж трос висисьёс, синтэмъёс, чутъёс, куасьмемъёс вулэсь вырземзэ возмаса уло вылэм. ⁴Кузё-Инмарлэн кылчинэз дырын-дырын пылатскон интые васькыса вуэз бу-

гыръяськытэ вылэм. Ву бугыръяськем бере, кин нырысь ик отчы пыре, со бурме, котькыче висёнэн vise ке но вылэм. ⁵Татын вылэм куамын тямь ар ёже висись адями. ⁶Иисус сое кыллыкуз адзем но, кема дыр ёже кыллемзэ тодэм бераз, солы шуэм: «Йонамед потэ-а?» ⁷Висись мурт Солы ответ сётэм: «Бен, Кузее; но ву бугыръяськыны кутскыку монэ вуэ лэзись муртэ мынам өвёл. Мон вуыку, мукетыз мынэсьтым азылогес пыре ини». ⁸Иисус солы шуэм: «Султы, басьты аслэсьтыд валестэ но ветлы». ⁹Со соку ик йонам, валессэ бастэм но ветлыны кутскем.

Нош та вылэм суббота нуналэ. ¹⁰Соин иудейёс бурмем муртлы шуиллям: «Туннэ суббота, валестэ бастыны тыныд уг яра». ¹¹Соослы со ответ сётэм: «Кин монэ бурмытйз, Со мыным шуиз: "Басты аслэсьтыд валестэ но ветлы"». ¹²Солэсь юаллям: «Кин Со Адями, Кудйз тыныд шуиз: "Басты аслэсьтыд валестэ но ветлы"?» ¹³Бурмытэм мурт уг тоды вылэм, кин Со; уго Иисус со интые учырам калык пёлы ватйськем. ¹⁴Со бере Иисус сое храмысен пумитам но шуэм: «Тани, тон йонад; талэсь уродэзгес тонэн медаз ни луы шуыса эн ни сьёлыка». ¹⁵Та адями мынэм но иудейёслы ялэм, сое Иисус бурмытйз шуыса. ¹⁶Иудейёс кутскиллям Иисусэз улляны; Сое виыны утчаллям, таёе ужёсты Со суббота нуналэ лэстэм шуыса. ¹⁷Нош Иисус соослы верам: «Мынам Атае туннэ нуналозь ужа, Мон но ужасько». ¹⁸Суббота нуналэз сөрем понназ гинэ өвёл, нош сое виыны иудейёс уката но золгес утчаллям, Инмарез

Аслаз Атаез шуэмез, Ассэ Инмарен огкадь каремез понна.

¹⁹Та пумысен Иисус шуэм: «Зэм ик, зэм ик тйледлы верасько: Пилэн Ас тодэмяз номыр но каремез уг луы, өз ке адзы, мар каре Атаез. Мар Со каре, сое озыы ик Пи но каре. ²⁰Уго Атай Пизэ яратэ, ваньзэ, мае Ачиз лэсьтэ, Солы возматэ. Солы талэсь бадзымесыгес ужъёс возматоз на, озыен, паймоды ай. ²¹Кызыы Атай кулэмьёсты улзйтъя но луло карылэ, озыы ик Пи но, кинэ луло каремез потэ, сое луло каре. ²²Атай нокинэ судить но уг кары, нош быдэсак судэз Пиезлы сётэм. ²³Кызыы Атаез сйлы каро, озыы ик Пиез но ваньмыз сйлы мед карозы шуыса. Кин Пиез сйлы уг кары, со Сое ыстйсь Атаез но сйлы уг кары. ²⁴Зэм ик, зэм ик тйледлы верасько: Мынэсьтым кылме кылзйськись но Монэ Ыстйсьлы оскись муртлэн быронтэм улонэз вань, судэ но уз сюры, со кулонысь улонэ выжемын. ²⁵Зэм ик, зэм ик тйледлы верасько: дыр вуэ, вуэмын но ни, кулэмьёс Инмар Пилэсь куаразэ кылозы, нош кылйзы ке, улзозы. ²⁶Кызыы Атайлэн Ас бордаз улонэз вань, озыы ик Пилы но Ас бордаз улон возыны сётйз. ²⁷Солы судить карыны но кужым сётйз, малы ке шуоно, Со – Адями Пи. ²⁸Эн паймелэталы: уго дыр вуэ, куке ваньмыз шайгуосын кыллсьёс Инмар Пилэсь куаразэ кылозы, ²⁹зеч уж лэсьтйсьёс быронтэм улонэ пырыны улзозы, нош урод уж лэсьтйсьёс – янгыше сюронлы улзозы.

³⁰Ас тодэмьям Мынам номыр но лэсьтэме уг луы. Кызыы кылйсько, озыы ик судить карисько.

Мынам судэ шонер, Аслэсьтым эрикме уг утчась-
кы, Монэ ыстэм Атаелэсь эриксэ утчасько.

³¹Мон Ас сярысьтым Ачим шара ивортйсько ке,
соку Мынам ивортэме зэм уг луы. ³²Вань мукетыз
Мон сярысь шара ивортйсь; Мон тодйсько, Мон
сярысь Солэн ивортэме зэм луэ шуыса. ³³Тй
Иоанн доры ысьяды, со зэмлык сярысь шара
ивортйз. ³⁴Адямиослэн ивортонзылы ёрмыса уг
улйськы, нош тае тй мед утиськоды шуыса ве-
расько. ³⁵Иоанн жуась, пиштйсь сюсьтыл вал; нош
тй солэн югытаз ёжытак шумпотыны турттйсь-
коды вал. ³⁶Иоаннлэн сярысь Мынам ивортонэ
бадзымгес: уго Атаелэн Мыным быдэстыны сётэм
ужьёсыз, самой та ужьёс, кудьёссэ Мон лэсь-
тйсько, Монэ Атай ыстйз шуыса, Мон сярысь ша-
ра иворто. ³⁷Монэ ыстйсь Атай Ачиз Мон сярысь
шара ивортйз. Нош тйляд Солэсь куаразэ ноку
но кылэмды өвёл, ымнырзэ но адземды өвёл,
³⁸тйляд пушкады Солэн кылыз но уг улы, малы
ке шуоно, тй уд оскиське Солэн ыстэм Муртэзлы.
³⁹Эскере Гожтэмьёсты: тй уго соос пыр малпась-
коды быронтэм улон басьтыны, нош соос Мон
сярысь шара иворто. ⁴⁰Улон басьтон понна, Мон
доры тйляд лыктэмды уг поты.

⁴¹Адямиослэсь данъямзэс кулэ уг кариськы.
⁴²Нош тйледыз тодйсько: тйляд пушкады Инмарез
яратонды өвёл. ⁴³Мон Атаелэн нимыныз лыктй
но тй Монэ кулэ уд кариське; нош кин ке аслаз
нимыныз лыктйз ке, сое кабыл басьтоды. ⁴⁴Кызы
тй оскыны быгатоны, куке ог-огдэс данъямез яра-
тйськоды, нош Инмар дорысь данлыкез басьтыны

уд сюлмаськиське? ⁴⁵Эн малпалэ, Мон тйледыз Атае азын янгыше уськыто шуыса: тйледыз янгыше уськытйсь Моисей вань, кудйз вылэ тй оскиськыса ульськоды. ⁴⁶Тй Моисейлы оскысалды ке, Мыным но оскысалды, со уго Мон сярысь гождяз. ⁴⁷Солэн гождямьёсызлы но уд оскиське бере, – кызы Мынам кыльёсылы оскоды?»

6-тй ЛЮКЕТ

¹Та бере Иисус Галилей, мукет нимыз Тивериада, зарезьлэн мукет палаз мынэм. ²Со бёрсы трос калык мынэм, малы ке шуоно, Солэсь висисьёсын паймымон ужъёс лэсьтэмзэ адзиллям. ³Иисус гурезе тубем но отын Аслаз дышетскисьёсыныз пукем. ⁴Матэ вуэ вылэм ни Быдзымнунал, иудейёслэн праздниксы. ⁵Иисус учкем но, Со доры лыктйсь трос калыкез адзыса, Филипплы шуэм: «Таосты сюдыны кытысь нянь басьтомы?» ⁶Нош та кыльёсты Со Филиппез эскерон понна верам; уго мар лэсьтыны одъямзэ Ачиз тодэ вылэм. ⁷Филипп Солы ответ сётэм: «Котькудйзлы пичи ке но кусок шедён понна, кык сю динарий тыр нянь соослы тырмыт уз луы». ⁸Дышетскисьёсыз пöлысь одйгез, Симон Петрлэн братэз Андрей, Солы шуэм: ⁹«Татын одйг пияшлэн вить йыды нянез но кык чорыгез вань; но мар со тамында калык понна?» ¹⁰Иисус шуэм: «Косэлэ соосты пуксьылыны». Та интыын нап турынез вылэм. Озы, ог вить сюрс мында калык пуксем. ¹¹Иисус нянь бась-

тэм но тау карыса дышетскисьёсызлы сёткам, нош дышетскисьёсыз – пукисьёслы; озыы ик чорыгез но – кинлы кӧня кулэ. ¹²Кӧтсы тырем бере, дышетскисьёсызлы шуэм: «Номыр но арам медаз луы, бичалэ кылем юдэсьёсты». ¹³Сиськемъёс бере вить йыды няньлэсь кылем юдэсьёссэ бичаса, дас кык кудыез тырмытйллям. ¹⁴Соку Иисуслэсь паймымон уж лэсьтэмзэ адзем адямиос шуиллям: «Зэмзэ ик Та Со Пророк, Кудйз дунне вылэ лыктыны кулэ». ¹⁵Лыктыса шуак кутыны но эксэй карыны турттэмзэс Иисус тодэм но, нош огназ гурезе кошкем.

¹⁶Жыт вуэм бере, Солэн дышетскисьёсыз зарезь дуре васькиллям. ¹⁷Пыже пырыса, зарезь тупала Капернауме кошкиллям. Жомыт усем ини, нош Иисус соос доры ялан уг лыкты. ¹⁸Кужмо төл пельтэм, зарезь бугыръяськем. ¹⁹Уяса ог кызь вить яке куамын стадия ортчем беразы, соос зарезь вылтй пыж доры матэ лыктйсь Иисусэз аджиллям но кышкатскиллям. ²⁰Иисус соослы шуэм: «Мон Со, эн кышкалэ». ²¹Сое соос пыжазы басьтыны туртто вылэм; мыноно интыязы вуыса, соку ик пыжзы ярдуре дугдэм.

²²Зарезьлэн огпалаз сылйсь калык мукет нуналаз адзем: отын одйг пыж сяна, кудаз Солэн дышетскисьёсыз пыризы, мукетыз өвӧл; Иисус Аслаз дышетскисьёсыныз пыже өз пыры, нош Солэн дышетскисьёсыз асьсэ понназы гинэ кошкызы шуыса. ²³Тивериадаысь мукет пыжъёс но Кузё-Инмарен бакель карыса нянь сием интылы матэ вуиллям. ²⁴Иисус но, Солэн дышетскисьёсыз но татын өвӧл

шуыса адземзы бере, адямиос пыжьёсазы пуксиллям но, Иисусэз утчаса, Капернауме вуиллям. ²⁵Зарезь тупаласен Сое шедьтйллям но Солы шуиллям: «Равви! Ку Тон татчы вуид?» ²⁶Соослы ответ сётыса, Иисус шуэм: «Зэм ик, зэм ик тйледлы верасько: паймымон ужъёсыз адземды понна Монэ уд утчаське, нянь сиемды но кётты тырлуэм понна утчаськоды. ²⁷Сисьмыса быроно сиён сярысь эн сюлмаське, быронтэм улонлэн сиёнэз сярысь сюлмаське, кудзэ тйледлы Адями Пи сётоз; уго Со вылэ Аслэсьтыз печатьсэ понйз Атай, Инмар». ²⁸Солы шуиллям: «Инмар ужез лэсьтон понна, милемлы ма кароно?» ²⁹Иисус соослы ответ сётыса шуэм: «Тй мед оскоды Солы, Кинэ Со ыстйз – та Инмар уж». ³⁰Та ласянь Солы шуиллям: «Ми мед аджомы но Тыныд мед оскомы шуыса, кыче тодмет Тон возматод? Мар Тон кариськод?» ³¹Милям атайёсмы кыр дуннеын манна сииллям, кызы гожтэмын: ”Соослы сиыны Инмысь нянь сётйз”». ³²Нош Иисус соослы шуэм: «Зэм ик, зэм ик тйледлы верасько: Инмысь нянь тйледлы Моисей өз сёты, нош Мынам Атае Инмысь тйледлы зэмос нянь сётэ. ³³Уго Инмар нянь луэ Со, Кудйз инмысь ваське но дуннелы улон сётэ».

³⁴Та пумысен Солы шуиллям: «Кузё! Котьку но милемлы сыче нянь сёт». ³⁵Нош Иисус соослы шуэм: «Мон луйсько улонлэн нянез; Мон доры лыктйсь муртлэн кётыз уз сюма, Мыным оскись муртлэн сюэз ноку но уз куасьмы. ³⁶Нош Мон тйледлы верай: Тй Монэ адзиды, но уд оскиське. ³⁷Ваньмыз, кинъёсты Мыным Атае сётэ, Мон доры

лыктозы, Мон доры лыктйсь муртэ улляса уг лэ-
збы. ³⁸Аслэсьтым эрикме быдэсьяны инмысь Мон
ой васькы уго, Монэ ыстйсь Атаелэсь эрикэс бы-
дэсьяны васьки. ³⁹Монэ ыстйсь Атаелэн эрикез
таче луэ: ваньзэ, кинэ Со Мыным сётйз, со пöлысь
нокудзэ но медам быдты, ваньзэ соосты берпум
нуналэ мед улзытом. ⁴⁰Монэ Ыстйсьлэн эрикез
таче луэ: котькудйзлэн, Пиез адзисьлэн но Со-
лы оскисьлэн, быронтэм улонэз мед луоз; берпум ну-
налэ Мон сое улзытыса султыто».

⁴¹«Мон Инмысь васькем нянь» шуэм понназ, иу-
дейёс Со-лы пумитъяськыны кутскиллям ⁴²но шу-
иллям: «Та Иосифлэн пиез Иисус öвöл-а, Кудйз-
лэсь атайзэ но, Анайзэ но ми тодйськомы? Кызбы
нош Со вера: ”Мон Инмысь васьки”?» ⁴³Иисус
соослы ответ сётыса шуэм: «Куспады зургетыса,
лекъяськыса эн улэ. ⁴⁴Нокинлэн но Мон доры
лыктэмез уз луы, Монэ ыстйсь Атае сое öз ке
кыскы. Нош Мон берпум нуналэ сое улзытыса
султыто. ⁴⁵Пророкёслэн гожтэмын: ”Ваньмыз
Инмарен дышетэмын луозы”. Котькудйз но Атае-
лэсь кылэм но дышетскем мурт Мон доры лыктэ.
⁴⁶Но со уг возъматы кин ке но Атаез адзиз шуыса:
Инмар дорысь Лыктйсь гинэ Атаез адзиз. ⁴⁷Зэм
ик, зэм ик тйледлы верасько: Мыным оскисьлэн
быронтэм улонэз вань. ⁴⁸Мон – улонлэн нянез.
⁴⁹Тйляд атайёсты кыр дуннеын манна сиизы но
кулйзы. ⁵⁰Инмысь васькись нянь сыче луэ: сое
сиись мурт уз кулы. ⁵¹Мон – Инмысь васькем улэп
нянь: та нянез сиись мурт бырытэк улоз. Нош
нянь, кудзэ Мон сёто, со луэ Мынам Мугоры,
сое Мон дуннелэн улонэз понна сёто».

⁵²Соку иудейёс куспазы ченгешыны кутскиллям но шуиллям: «Кызы Со Аслэсьтыз Мугорзэ асьмелы сиыны сётоз?» ⁵³Нош Иисус соослы шуэм: «Зэм ик, зэм ик тйледлы верасько: Адями Пилэсь Мугорзэ өд ке сие, Солэсь Вирзэ өд ке юэ, тй пушкын улон уз луы. ⁵⁴Мынэсьтым Мугорме сиисьлэн, Мынэсьтым Вирме юисьлэн быронтэм улонэз вань, берпум нуналэ Мон сое улзытыса султыто. ⁵⁵Уго Мынам Мугоры зэм ик сиён луэ, Мынам Виры зэм ик юон луэ. ⁵⁶Мынэсьтым Мугорме сиись, Мынэсьтым Вирме юись Мон бордын улэ, Мон но со бордын. ⁵⁷Кызы Монэ улэп Атай ыстйз, Мон но Атаен улйсько, озыи ик Монэ сиись но Монэн улоз. ⁵⁸Таиз та Инмысь васькемез нянь. Кызы тйляд атайёсты манна сиизы но кулйзы, озыи уз луы, та нянез сиись пумтэм вапуме улоз». ⁵⁹Тае Со синагогаын верам, Капернаумын дышетыкуз.

⁶⁰Тае кылыса, тросэз Солэн дышетскисьёсыз вераськиллям: «Кыче паймоно кадесь кыльёс! Кин тае кылзыны быгатоз?» ⁶¹Нош Иисус, дышетскисьёсылэсь та пумысен зургетэмзэс шөдыса, соослы шуэм: «Таин-а тйляд визьды сынаське?» ⁶²Мар нош луоз, адзиды ке Адями Пилэсь кытын азъвыл вал отчы жутскемзэ? ⁶³Дух улэп каре, лулмугор өжыт но пайда уг кары. Мынам тйледлы верам кыльёсы дух но улон луо. ⁶⁴Нош тй пöлын вань оскымтэос но». Уго Иисус кутсконысеныз ик тодэм, кинёс луо оскисьтэмьёс, кин Сое кутыса сётоз. ⁶⁵Иисус шуэм: «Со понна ик уго Мон тйледлы вералляй: Атаеным сётэмын өз ке луы, нокилэн но Мон доры лыктэмез уз луы».

⁶⁶Та дырысен кутскыса, тросэз дышетскисьёсыз Со дорысь кошкиллям но Соин огазын ветлйлямтэ ини. ⁶⁷Соку Иисус дас кыкназылы шуэм: «Тй но палэнскыны уд турттйське-а?» ⁶⁸Солы ответ сётыса, Симон Петр шуэм: «Кузё-Инмаре! Кин доры милемлы мыноно? Тынад быронтэм улонлэн кыльёсыз вань. ⁶⁹Ми оскимы но тодймы, Тон – Христос, улэп Инмарлэн Пиез шуыса». ⁷⁰Иисус соослы ответ сётэм: «Дас кыкнадэс Мон ой-а бырйы? Нош тй пöлысь одйгез дьявол». ⁷¹Тае Со Искариот Симон пи Иуда сярысь верам, со уго, дас кык пöлысь одйгез луыса, Сое кутыса сётоно вылэм.

7-тй ЛЮКЕТ

¹Та бере Иисус Галилеяетй ветлэм, Иудеяетй ветлэмез потымтэ, малы ке шуоно, иудейёс Сое виыны турттыса утчаллям. ²Иудейёслэн тылыс пуктон праздниксы* матэ вуэ вылэм. ³Соку братьёсыз Солы шуиллям: «Татысь пот но Иудеяе мын, Ты нэсьтыд лэсьтэм ужьёстэ дышетскисьёсыд но мед адзозы. ⁴Кин ассэ тодмо карыны тырше, номыре но лушкемен уг лэсьты; Тон сыче ужьёс лэсьтйськод ке, Астэ дуннелы возьматы». ⁵Солэн братьёсыз но Солы уг оско вылэм. ⁶Та пумысен Иисус соослы шуэм: «Мынам дыры өз на вуы, нош тйледлы котькыче дыр тупа. ⁷Тйледыз дунне адзем-

* 7:2 Зуч кылын: праздник кушей. Лев. 23:34-36.

потостэм карыны уг быгаты, нош Монэ адземпостостэм каре, малы ке шуоно, Мон шара ивортйсько солэн ужъёсыз уродэсь шуыса. ⁸Тй та празднике мынэ, нош Мон та празднике уг на мыны, малы ке шуоно, Мынам дыры өз на вуы». ⁹Тае соослы верам но Ачиз Галилеяе кылем.

¹⁰Нош братъёсыз кошкем бере, Со но празднике мынэм, шара өвёл, ватскыса сямен мынэм. ¹¹Иудейёс Сое праздникысен утчаллям но шуиллям: «Кытын Со?» ¹²Калык пöлын Со сярысь трос пумо вераськонъёс вылэм: одйгъёсыз «Со лякыт» шуыса вераллям, нош мукетъёсыз шуиллям: «Өвёл, Со калыкез сура-пожа». ¹³Иудейёслэсь кышкаменызы, нокин но Со сярысь шара верамтэ.

¹⁴Нош праздниклэн шор вадесаз ини Иисус храме пырем но дышетэм. ¹⁵Иудейёс паймыса вераськиллям: «Дышетскытэк кызы Со Гожтэмъёсты тодэ?» ¹⁶Соослы ответ сётыса, Иисус шуэм: «Мынам дышетонэ – Мынам өвёл, Монэ Ыстйсьлэн со. ¹⁷Кин Инмарлэсь эрикэс быдэсьяны турттэ, со та дышетон сярысь тодоз, – Инмарлэсь-а со, яке Мон Аслэсьтым Ачим-а верасько. ¹⁸Аслэсьтыз ачиз верась аслыз дан утча; нош кин Сое Ыстйсьлы дан утча, Со зэмлыко, Со бордын öрекчаськон өвёл. ¹⁹Моисей тйледлы закон өз сёты-а? Нош одйг мурт но тй пöлысь законэз уг быдэсья. Мар понна Монэ виыны утчаськоды?» ²⁰Ответ сётыса, калык шуэм: «Тон пушкын пери өвёл-а? Кин Тонэ виыны утча?» ²¹Веранзэ азьланьтыса, Иисус соослы шуэм: «Одйг уж Мон лэсьтй но, ваньды тй паймиськоды. ²²Моисей тйледлы вандйськон

сөтйз, – но со сям атайёслэсь, Моисейлэсь өвёл,
– нош тй суббота нуналэ но адямилэсь вандйсь-
коды. ²³Моисейлэн законэз сөриськемын медаз
луы шуыса, адямины суббота нуналэ но вандйсь-
кон сямез ортчйтйськоды ке, суббота нуналэ Мон
адямиез быдэсак бурмытэм понна, Мон вылэ-а
йыркуръяськиськоды? ²⁴Вылтусья судить эн каре,
шонерлыко судэн судить каре».

²⁵Куд-ог Иерусалим мургъёс шуиллям: «Та Со
өвёл-а, Кудзэ виыны утчало? ²⁶Тани Со шара вера,
нош Со лы номыр но уг шуо: кузёйыръёсмылы
тодмо өз луы меда, Со зэмзэ но Христос шуыса?
²⁷Ми Сое тодйськомы, кытысь Со; нош Христос
лыктйз ке, нокин но уз тоды, кытысь Со». ²⁸Соку
Иисус храмын куаразэ бадзыматыса, дышетыса
верам: «Тодйськоды Монэ, тодйськоды кытысь
Мон. Мон Ас тодэмьям ой лыкты; Монэ Ыстйсь
вань, но Сое тй уд тодйське. ²⁹Мон Сое тодйсько,
малы ке шуоно, Мон Со дорысь, Со Монэ ыстйз».
³⁰Сое кутыны утчаллям, но нокин но Со вылэ
кизэ жутымтэ, малы ке шуоно, Солэн часэз вуым-
тэ на вылэм. ³¹Нош калык пöлысь тросэз Со лы
оскиллям но шуиллям: «Христос лыктйз ке, оло
Таиз сярысь тросгес паймымон ужъёс лэсьтоз-а?»
³²Калык пöлын Со сярысь сыче вераськонъёсты
фарисейёс кылллям. Фарисейёс но архиерейёс
Сое кутыны вылысь медоосты ыстйллям. ³³Нош
Иисус соослы шуэм: «Кема ик Мыным тйледын
валче улоно өвёл ни, Монэ Ыстйсь доры мыно.
³⁴Монэ утчалоody но уд шедьтэ; кытын Мон луо,
тйляд отчы лыктэмды уз луы». ³⁵Та ласянь иудейёс

куспазы вераськиллям: «Кытчы Со мыныны медэ, ноказыы но, пе, ми Сое ум шедьтэ? Уг öдья-а Со еллинъёс пöлын пазьгиськыса улйсьёс доры мыныны но еллинъёсты дышетыны? ³⁶Мае возматэ Солэн та верам кыльёсыз: ”Монэ утчалоды но уд шедьтэ; кытын Мон луо, тйляд отчы лыктэмды уз луы”?»

³⁷Праздниклэн берпуметй быдзым нуналаз Иисус сылэм но бадзым куараен верам: «Кинлэн сюэз куасьме, лыкты Мон доры но ю; ³⁸кызы шуэмын Гожтэмын: ”Кин Мыным оске, солэн пушкысьтыз улэп вуэн шуръёс бызёзы”». ³⁹Тае Со Дух сярысь верам, Кудзэ Со лы оскисьёс басьтыны быгатозы. Соос вылын Святой Дух вылымтэ на, – со виын Иисус данэ поттэмын вылымтэ на уго.

⁴⁰Тросэз калык пöлысь та кыльёсты кылыса шуиллям: «Со зэмзэ но пророк». ⁴¹Мукетъёсыз шуиллям: «Та – Христос». Нош мукетъёсыз шуиллям: «Галилеяысь Христос лыктоз шат? ⁴²Верамын öвöл-а Гожтэмын, Христос Давидлэн кидыс бордысьтыз лыктоз, Вифлеемысь, пичи городысь, кытын вордскиз Давид?» ⁴³Озы, калык пöлын Со пумысен ченгешон потэм. ⁴⁴Соос пöлысь куд-огъёсыз Иисусэз кутыны медо вылэм; но нокин но Со вылэ кизэ жутымтэ.

⁴⁵Медоос архиерейёс но фарисейёс доры берытскиллям, таослы соос шуиллям: «Малы тй Сое öд вае?» ⁴⁶Медоос ответ сётйллям: «Адями ноку но тазы öз на вера, кызы Та Адями». ⁴⁷Фарисейёс соослы шуиллям: «Оло тй но визь сынаськонэ усиды ке шат? ⁴⁸Кузёйыръёс яке фарисейёс пöлысь

кин ке но Солы оскыны кутскиз-а? ⁴⁹Нош та, законэз валасьтэм калык, каргамын». ⁵⁰Соос пöлысь одйгез, Никодим, кудйз уин Со доры ветлэм, соослы шуэм: ⁵¹«Асьмелэн законмы адямиез судить каре-а, нырысь ик сое уг ке кылзо, уг ке тодо солэсь ма каремзэ?» ⁵²Та пумысен солы шуиллям: «Тон но Галилеяысь öвöл-а? Чакла но адзы: Галилеяысь пророк уг лыкты». ⁵³Собере ваньзы доразы кошкиллям.

8-тй ЛЮКЕТ

¹Иисус Елеон гурезе мынэм. ²Їукна нош ик храме лыктэм, вань калык Со доры люкаськем. Со пуксем но соосты дышетыса улэм. ³Книга тодйсьёс но фарисейёс азон съöлык лэсьтыкуз кутэм кышномуртэз Со доры ваиллям но люкаськем калыклэн шораз султытыса, ⁴Солы шуиллям: «Дышетйсь! Та кышномурт азон съöлык лэсьтыкуз кутэмын; ⁵нош Моисей законын таёосты изэн лэзьяса виылыны косэмын: Тон мар шуод?» ⁶Сое янгыше уськытон понна, Солэсь визьзэ сынаса, тае вераллям. Нош Иисус мыкырскыса, соос шоры учкытэк, музейем вылэ чиньыеныз гожъям. ⁷Нош соос ялан юалляськиллям на, соин ик Со шонерскыса соослы шуэм: «Тй пöлысь кин съöлыктэм, нырысь ик со шоры изэн лэзь». ⁸Нош ик улэ мыкырскыса, музейем вылэ гожъяса улэм. ⁹Тае кылыса но возьытлыксы ёушканы кутскемен, соос, бадзымъёсыз бордысен кутскыса берпумь-

ёсыз дорозь, огзы бере огзы кошкылыны кутскиллям. Иисус одйгназ кылем; Солэн аязз сылэм кышномурт. ¹⁰Иисус шонертйськыса учкем но кышномуртэз сяна, нокинэ адзымтэ; собере со кышномуртлы шуэм: «Кышномурт! Кытын тынад янгыше уськытйсьёсыд? Нокин но тонэ судить өз кары-а?» ¹¹Со ответ сётэм: «Нокин но, Кузёе!» Иисус солы шуэм: «Мон но тонэ судить уг кариськы; мын но азыланяз эн ни сьöлыка».

¹²Иисус нош ик калыкен вераськыны кутскем, соослы шуэм: «Мон дуннелы югыт; Мон сьöры мынйсь, пеймытын уз ветлы, со бордын улонлэн югытэз луоз». ¹³Соку Солы фарисейёс шуиллям: «Тон Ачид сярись Ачид шара ивортйськод, Тынад ивортэмед зэм öвöл». ¹⁴Соослы ответ сётыса, Иисус шуэм: «Мон Ачим сярись Ачим шара ивортйсько ке но, Мынам ивортэме зэм, малы ке шуоно, Мон тодйсько кытысь лыктэмме но, кытчы мынэмме но. Нош тй уд тодйське, кытысь Мон, кытчы мынйсько. ¹⁵Тй лулмугорья судить кариськоды, Мон нокинэ но судить уг кариськы. ¹⁶Мон судить карисько ке но, Мынам судэ зэм, малы ке шуоно, Мон одйгнам öвöл, – монэн ёош Монэ ыстйсь Атае. ¹⁷Тйляд законады но гожтэмын ук, кык муртлэн шара ивортэмез зэм луэ шуыса. ¹⁸Мон Ас сярисьтым Ачим шара ивортйсько, Мон сярись шара ивортэ на Монэ ыстйсь Атае но». ¹⁹Соку Солы шуиллям: «Кытын Тынад Атаед?» Иисус ответ сётэм: «Тй Монэ но, Мынэсьтым Атайме но уд тодйське; тй Монэ тодысалды ке, Мынэсьтым Атайме но тодысалды». ²⁰Та кыльёс-

ты Иисус, храмын дышетыкуз, ваньбур тырон до-
рысен верам. Нокин но Сое кырмымтэ, малы ке
шуоно, Солэн часэз вуымтэ на вылэм.

²¹Иисус нош ик соослы шуэм: «Мон кошкисько,
Монэ утчалоды, сьöлыкъёсты пöлын кулоды.
Кытчы Мон мынйсько, отчы тй лыктыны уд
быгатэ». ²²Соку иудейёс вераськиллям: «"Кытчы
Мон мынйсько, отчы тй лыктыны уд быгатйсь-
ке" шуэ ке, оло Ассэ Ачиз быдтыны медэ-а?»
²³Соослы Со шуэм: «Тй улй дуннеысь, Мон вы-
лйысьтыз; тй та дуннеысь, Мон та дуннеысь öвöл.
²⁴Соин ик Мон тйледлы шуи: "Тй сьöлыкъёсты
пöлын кулоды", та Мон луйсько шуыса öд ке оске,
соку асьтэлэн сьöлыкъёсты пöлын кулоды». ²⁵Соку
Солы шуиллям: «Кин бен Тон?» Иисус соослы
шуэм: «Кызы тйледлы верасько, кутсконысеныз
ик Луись. ²⁶Трос Мынам тй сярысь веранэ, судить
каронэ; нош Монэ Ыстйсь зэм луэ, мар Мон Со-
лэсь кылй, сое ик дуннелы верасько». ²⁷Валаллям-
тэ, соослы Со Атай сярысь вера шуыса. ²⁸Озы,
Иисус соослы шуэм: «Кукке Адями Пиез жутйды,
соку тододы, та – Мон шуыса. Ачим тодэмья
номыре но уг кариськы, нош кызы Монэ Атае
дышетйз, озы ик верасько. ²⁹Монэ Ыстйсь Монэн
луэ. Атае Монэ огнаме öз кельты, Мон уго котьку
но сое лэсьтйсько, мар Солы ярано». ³⁰Со тае
вераку, тросэз Солы оскыны кутскиллям.
³¹Соку Иисус оскыны кутскем иудейёслы верам:
«Мынам кылыя улйды ке, тй зэмзэ но Мынам
дышетскисьёсы луоды, ³²Зэмлыкез тододы, нош
зэмлык тйледыз эрико кароз». ³³Солы ответ сё-

тйллям: «Ми – Авраамлэн кидысэз, ноку но, нокинлэн но ляльчиосыз ой вал; кызыы озыы Тон вераськод: ”Эрикoesь луоды”?»³⁴ Иисус соослы ответ сётэм: «Зэм ик, зэм ик тйледлы верасько: котькудйз сьолык лэсьтйсь, сьолыклэн ляльчиез луэ.³⁵ Ляльчи пумтэм даурьёс чоже кузё дорын уг улы: пи пумтэм даурьёс чоже улэ.³⁶ Озыен, Пи тйледыз мозмытйз ке, соку зэм ик эрико луоды.³⁷ Тодйсько, тй Авраамлэн кидысэз шуыса; озыы ке но, Монэ виыны утчаськоды, малы ке шуоно, Мынам кылы тй пушкы уг тэры.³⁸ Мон вераськo сое, мае Мон Атае дорысен адзи; нош тй лэсьтйськоды сое, мае асьтэлэн атайды дорысен адзиды».

³⁹Солы ответ сётыса шуиллям: «Милям атаймы – Авраам». Иисус соослы шуэм: «Тй Авраамлэн нылпиосыз луысалды ке, Авраамлэсь ужьёссэ лэсьтысалды.⁴⁰ Нош табере Монэ, Инмар бордысь кылэм зэмлыкез тйледлы верась Адямиез, виыны утчаськоды: Авраам тазыы өз лэсьтылы.⁴¹ Тй асьтэлэн атайдылэсь ужьёссэ лэсьтйськоды». Та пумысен Солы шуиллям: «Ми азыса улон пыр вордйськемын өвөл; одйг Атаймы вань – Инмар».⁴² Иисус соослы шуэм: «Тйляд Атайды Инмар ке луысал, тй Монэ яратысалды, малы ке шуоно, Мон Инмар дорысь потй но лыктй. Уго Мон Ачим тодэмья ой лыкты, Со Монэ ыстйз.⁴³ Малы тй Мынэсьтым верамме уд валаське? Малы ке шуоно, уд быгатйське Мынэсьтым кылме кылыны.⁴⁴ Тйляд атайды дьявол, тй асьтэлэн атайдылэсь кулэ каремьёссэ быдэсьяны турттйськоды. Со кутсконысеныз ик адями виись вал. Со зэмлыкын

сылыны өз быгаты, уго со бордын зэмлык өвөл. Öрекчаськыкуз со аслэсьтыззэ вера, со уго öрекчаськись, öрекчаськонлэн атаез. ⁴⁵Мон зэмлыкез верасько, нош тй Мыным уд оскиське. ⁴⁶Кин тй пöлысь Монэ öрекчаськисько шуыса шарае поттоз? Зэмлыкез ке Мон верасько, малы бен тй Мыным уд оскиське? ⁴⁷Кин Инмарлэсь, со Инмар кылэз кылзйське. Тй Инмарлэсь өвөл, соин ик Инмар кылэз уд кылзйське».

⁴⁸Та пумысен иудейёс ответ сётйллям но Солы шуиллям: «Ми шонер ум вераське-а, Тон Самария мурт, Тон пушкын пери вань шуыса?» ⁴⁹Иисус ответ сётэм: «Мон пушкын пери өвөл. Мон Аслэсьтым Атайме сйлы карисько, нош тй Монэ сйтэм-сантэм кариськоды. ⁵⁰Мон Аслэсьтым данме уг утчаськы: Утчась но Судить карись вань. ⁵¹Зэм ик, зэм ик тйледлы верасько: "Кин Мынэсьтым кылме быдэсьялоз, со ноку но кулонэз уз адзы"». ⁵²Иудейёс Солы шуиллям: «Табере ми тодймы, Тон пушкын пери вань шуыса. Авраам кулйз, пророкёс но, нош Тон шуиськод: "Кин Мынэсьтым кылме быдэсьялоз, со кулонэз ноку но уз адзы". ⁵³Оло Тон милям Авраам атаймылэсь, кудйз кулйз, бадзымгес? Пророкёс но кулйзы: Тон Астрэ кин кариськод?» ⁵⁴Иисус ответ сётэм: «Мон Асме Ачим даньясько ке, соку Мынам данэ номырлы но ярантэм: Монэ Атае данья, Кудйз сярысь тй "Со милям Инмармы" шуиськоды. ⁵⁵Тй Сое öд тодэ, нош Мон Сое тодйсько. Нош шуи ке "Сое уг тодйськы", соку Мон тй выллем ик öрекчи луисько. Но Мон Сое тодйсько, Солэсь кылзэ но

быдэсьясько. ⁵⁶Тйляд атайды Авраам Мынэсьтым нуналме адзо шуыса шумпотэмын вал: адзиз но шумпотйз». ⁵⁷Та пумысен иудейёс Солы шуиллям: «Тыныд витьтон арес но овёл, – нош Тон Авраамез адзид?» ⁵⁸Иисус соослы шуэм: «Зэм ик, зэм ик тйледлы верасько: Авраам вордскемлэсь азьло Мон вал ини». ⁵⁹Соку Со вылэ зйртон вылысь изьёс кутйллям; нош Иисус ватйськем, соослэн шортйзы ортчыса, храмысь потыса кошкем.

9-тй ЛЮКЕТ

¹Кошкыкуз вордскем дырысеныз синтэм муртэ адзем. ²Солэн дышетскисьёсыз Солэсь юаллям: «Равви! Синтэм вордскем понназ кин съолькам, со-а яке анай-атайёсыз-а?» ³Иисус ответ сётэм: «Со но өз, анай-атайёсыз но өз съолькалэ, но та со понна: Инмарлэн ужьёсыз со вылын мед адекозы. ⁴Нунал вань дыръя, Монэ Ыстйсьлэсь ужьёссэ Мон лэсьтыны кулэ; уй ке вуэ, соку нокин но, номыр но лэсьтыны уг быгаты. ⁵Мон дуннеын дырьям, Мон дуннелы югыт луйсько». ⁶Тае вераса, Со музьем вылэ сялзем, дыльдыеныз наштам лэсьтэм, наштамэныз синтэм муртлэсь синьёссэ зырам, ⁷собере шуэм: «Мын Силоам пылатскон интые, кудйз "ыстэм" шуэм луэ, но мисьтйськы». Со мынэм, мисьтйськем но адзыны быгатйсь луыса вуэм. ⁸Бускельёсыз но сое синтэмен азьвыл адзем муртёс вераськиллям: «Кураськыса пукись мурт овёл-а та?» ⁹Кудьёсыз шуиллям: «Та со»,

нош кудьёсыз: «Солы кельше». Со мурт шуэм: «Мон со». ¹⁰Соку солэсь юаллям: «Кызы тынад синьёсыз усьтйськызы?» ¹¹Со ответ сётыса шуэм: «Иисус шуон Аядями наштан лэсьтйз, синьёсме зыраз но мыным шуиз: "Мын Силоам пылатскон интые но мисьтйськы". Мон мынй, мисьтйськи но адзыны кутски». ¹²Соку солы шуиллям: «Кытын Со?» Со ответ сётэм: «Уг тодйськы».

¹³Тае, азвыл синтэмез, фарисейёс доры нуиллям. ¹⁴Нош Иисус солы наштан лэсьтыса синьёссэ усьтон нуналэ суббота вылэм. ¹⁵Озы ик солэсь, «кызы адзись луид» шуыса, фарисейёс но юаллям. Соослы со шуэм: «Со мынам синьёсам наштан понйз, мон мисьтйськи но адзисько ини». ¹⁶Соку фарисейёс пöлысь куд-огез шуиллям: «Та Аядями Инмарлэсь öвöл, малы ке шуоно, субботаез уг уты». Мукетьёсыз шуиллям: «Кызы съöлыко аядями таçe паймымон ужёс лэсьтыны быгатоз?» Соос кустын ченгешон вылэм. ¹⁷Нош ик синтэмлы шуиллям: «Тон Со сярысь мар вералод, Со тынэсьтыд синьёстэ усьтйз ук?» Со шуэм: «Пророк Со».

¹⁸Адзыны кутскисьлэсь анай-атайёссэ вайытэк, иудейёс оскиллямтэ, со синтэм вал но адзыны кутскиз шуыса. ¹⁹Анай-атайёсызлэсь юаллям: «Та-а тйляд пида, со сярысь-а синтэм вордскиз шуиськоды? Нош кызы со табере адзе ини?» ²⁰Анай-атайёсыз соослы ответ сётыса шуиллям: «Ми тодйськомы, та милям пимы, со синтэм вордскиз. ²¹Нош кызы со табере адзе, ум тодйське, кин солэсь синьёссэ усьтэм, ум тодйське: со ачиз

быдэ вуэм мурт ини, аслэсьтыз юалэ. Ачиз сярысь ачиз мед вералоз». ²²Тазы ответ сёткаллям солэн анай-атайёсыз, соос уго иудейёслэсь кышкаллям; иудейёс огкылысь вераськиллям вылэм ини: кин Сое Христос шуыса оскыса вераз ке, со муртэ синагога бордысь люкыса палэнтыны. ²³Соин ик уго анай-атайёсыз но шуиллям: «Со быдэ вуэм мурт ини, аслэсьтыз юалэ».

²⁴Озы, кыкетй ползэ отиллям синтэм вылэм муртэ но солы шуиллям: «Зэмзэ верасько шуыса, Инмарез данъя; ми тодйськомы, Со Адами съёлыко шуыса». ²⁵Со соослы ответ сётыса шуэм: «Съёлыко-а Со, өвёл-а, – уг тодйськы; одйгзэ тодйсько: мон синтэм вал, нош табере адзисько». ²⁶Солэсь нош ик юаллям: «Мар Со тонэн кариз? Кызы Со тынэсьтыд синъестэ усьтйз?» ²⁷Соослы ответ сётэм: «Мон тйледлы верай ини, нош тй өд кылзйське. Ма сярысь эшшо кылэмды потэ на? Оло нош тйляд но Солэн дышетскисьёсыз луэмды потэ?» ²⁸Нош соос сое пыкылыса шуиллям: «Тон Солэн дышетскисез, нош ми Моисейлэн дышетскисьёсыз. ²⁹Ми тодйськомы, Моисеен Инмар вераськиз шуыса, нош Тае ум тодйське, кытысь Со». ³⁰Синмыз усьтйськем адами соослы ответ сётыса шуэм: «Со ик паймымон но: тй уд тодйське, кытысь Со, нош Со мынэсьтым синъёсме усьтйз. ³¹Ми тодйськомы: съёлыкоосты Инмар уг кылзы, нош кин Инмарез сйлы каре но Солэсь эриксэ быдэсья, сое кылзэ. ³²Синтэм вордскем муртлэсь синзэ усьтон – дауръёслэн кутсконысенызы кылылэмын өвёл. ³³Со Инмар бордысь ой

ке луысал, номыр но лэсьтыны өй быгатысал». ³⁴Солы ответ сётыса шуиллям: «Быдэсак съöлык пöлын тон вордскемын, но тон ик-а милемыз дышетйськод?» Сое педло улляса лэзиллям.

³⁵Сое улляса лэземзэс Иисус кылэм но, сое шедьтыса, солы шуэм: «Тон Инмар Пилы оскиськод-а?» ³⁶Со ответ сётэм но шуэм: «Кузёе, нош кин Со, мон Солы мед оском шуыса?» ³⁷Иисус солы шуэм: «Адзид ни тон Сое, Со ик тонэн вераське но». ³⁸Нош со шуэм: «Оскисько, Кузё-Инмаре!» но Солы йыбырттэм. ³⁹Иисус шуэм: «Адзисьтэмьёс мед адзозы, нош адзисьёс адзисьтэм мед луозы шуыса, судэн Мон та дуннее лыктй».

⁴⁰Соин чош луэм фарисейёс пöлысь куд-огез, тае кылыса, Солы шуиллям: «Оло ми но синтэмесь-а?» ⁴¹Иисус соослы шуэм: «Синтэмесь ке тй луысалды, тйляд вылады съöлык өй луысал; нош тй "адзиськом" шуиськоды бере, тй вылэ съöлык кылёз».

10-тй ЛЮКЕТ

¹«Зэм ик, зэм ик тйледлы верасько: кин ыж возён азбаре öсэти уг пыры, мукет азьти со кечырскыса пыре ке, со лушкаськись, талась-виылйсь. ²Нош öсэти пырись со ыжёслэн возьмасьсы луз: ³öс дорын возьмаськись солы усьтэ но ыжёс солэн куараезлэсь кылзйсько, аслэсьтыз ыжёссэ со нимынызы öтьыса кыре поттэ. ⁴Ыжёссэ поттэм бере, соослэн аязызы мынэ; нош ыжёс со бёрсын

мыно, малы ке шуоно, солэсь куаразэ тодмало.
⁵Мурт сьöры уг мыно, со дорысь ворттыса кошко,
малы ке шуоно, муртлэсь куаразэ уг тодмало».
⁶Та мадёнэз Иисус соослы верам. Нош соос ва-
лаллямтэ, мар Со соослы вераз.

⁷Нош ик Иисус соослы верам: «Зэм ик, зэм ик
тйледлы верасько: Мон ыжъёслы öс. ⁸Ваньмыз,
Мынэсьтым азьвыл лыктылэмъёс лушкаськисьёс
но талась-виыльсьёс; ыжъёс соослэсь öз кылзйсь-
ке. ⁹Мон – öс: кин Мон пыр пыроз, со утиськоз,
пыроз но, потоз но, ыж возман инты но шедьтоз.
¹⁰Нош лушкаськись лыктэ ке, лыктэ лушканы,
виыны, быдтыны. Улон вайыны, улонзы мултэсэн
мед луоз шуыса, Мон со понна лыктй. ¹¹Мон зеч
ыж возмась: зеч ыж возмась ыжъёсыз понна
аслэсьтыз улонзэ понэ. ¹²Нош медьяськем мурт,
кудйз понна ыжъёс аслаз уг луо, со ыж возмась
öвöл: адже лыктйсь кионэз но ыжъёссэ кельтыса
пегже, нош кион ыжъёсты лушкаса нуэ, пазыгись-
кытэ соосты. ¹³Медьяськем мурт пегже, малы ке
шуоно, со медьяськем мурт, ыжъёс понна уг сюл-
маськы. ¹⁴Мон – зеч ыж возмась, Аслэсьтымъёссэ
тодйсько, Асламъёсыз но Монэ тодо. ¹⁵Кызы
Монэ Атае тодэ, озы ик Мон Атайме тодйсько
но Аслэсьтым улонме ыжъёс понна сётйсько.
¹⁶Вань на Мынам мукет ыжъёсы но, кудъёсыз та
азбарысь öвöл, соосты но Мыным вайыны кулэ:
соос но Мынэсьтым куараме кылозы, – соку луоз
одйг уллө, одйг Возмась. ¹⁷Монэ Атае соин яратэ:
Мон Аслэсьтым улонме сётйсько, нош ик сое
басьтон понна. ¹⁸Нокин но сое Мынэсьтым уг та-

ла, Мон Ачим сое сѣтйсько: сое сѣтыны эрик
вань, берен басьтыны но эрике вань; та курон-
косонэз Мон Аслам Атае кийсь басьтй».

¹⁹Та кыльѣс пумысен иудейѣс куспын нош ик
ченгешон потэм. ²⁰Тросэз соос пӧлысь шуиллям:
«Со перияськемын но визьтэмьяське; мар Сое
кылзйськоды?» ²¹Мукетъёсыз шуиллям: «Та
кыльѣс перияськем муртлэн ӧвӧл; быгатоз-а пери
синтэмъёслэсь синзэс усьтыны?»

²²Соку Иерусалимын храмез чылкытатон празд-
ник* вуэм, толалтэ вылэм. ²³Иисус храмтй, Соло-
монлэн бӧльмыетйз ветлэм. ²⁴Сое иудейѣс котыр-
тйллям но Солы шуиллям: «Кема-а Тон милемыз
паймытыса возѣд на? Христос ке Тон, милемлы
шонерак вера». ²⁵Иисус соослы ответ сѣтэм: «Мон
тйледлы верай, нош тй уд оскиське; ужъѣс, кудъ-
ѣссэ Мон Аслам Атаелэн нимыныз лэсьтйсько,
соос Мон сярись шара иворто. ²⁶Нош тй уд ос-
киське, кызы Мон тйледлы верай, тй уго Мынам
ыжъёсы пӧлысь ӧвӧл. ²⁷Мынам ыжъёсы Мынэсь-
тым куараме кылзйсько, Мон соосты тодйсько,
соос Мон сьӧры мыно. ²⁸Мон соослы быронтэм
улон сѣтйсько, соос ноку но уз быре, нокин но
соосты Мынам ки улысьтым уз лушка. ²⁹Мынам
Атае, Кудйз Мыным соосты сѣтйз, ваньмызлэсь
быдъым, нокин но соосты Мынам Атаелэн ки
улысьтыз лушканы уз быгаты: ³⁰Мон Атаен —
одйг».

* 10:22 Зуч кылын: праздник обновления. 1 Мак. 4:52-59.

³¹Иудейёс Сое виён вылысь, нош ик изъёс кутылллям. ³²Иисус соослы ответ сётэм: «Аслам Атаелэсь трос зеч ужъёссэ Мон тйледлы возматй. Соос пöлысь кудйз понна Монэ изэн зйръяса виыны медйськоды?» ³³Иудейёс Солы ответ сётыса шуиллям: «Зеч уж понна изэн зйръяса Тонэ виыны ум медйське, нош Инмарез сантэмамед но аядми луэм вылысьтыд Астэ Ачид Инмар каремед понна, со ужез лэсьтыны медйськомы». ³⁴Иисус соослы ответ сётэм: «Тйляд законады гожтэмын öвöл-а "Мон шуи: тй инмаръёс"?» ³⁵Кинъёслы Инмар кыл вуэм, соосты Со "инмаръёс" шуыса нимама ке, – Гожтэм сöриськыны уз быгаты. ³⁶Солы-а, Дун-Сьöлыктэмлы, Кудзэ Атай, зечлы сйзьыса, дуннее ыстйз, тй шуиськоды: "Инмарез сантэмаськод", малы ке шуоно, Мон шуи: "Мон Инмар Пи"?» ³⁷Атаелэсь ужъёссэ уг ке лэсьтйськы, эн оскелэ Мыным. ³⁸Нош лэсьтйсько ке, Мыным уд оскиське ке, оске Мынам ужъёсылы, мед тододы но оскоды, Мон пушкын Атае, нош Мон Со пушкын шуыса». ³⁹Соку нош ик Сое кутыны утчаллям; нош Со соослэн ки улысьтызы палэнтйськем.

⁴⁰Нош ик Иордан сьöры, кытын азьвыл Иоанн пылатыса улэм, со интые кошкем но отчы кылем.

⁴¹Тросэз Со доры лыктйллям но шуиллям: «Иоанн ноқыче но паймымон ужъёс öз лэсьты; но ваньмыз, мае Со сярысь Иоанн вераз, зэм вылэм».

⁴²Отысен тросэз Солы оскыны кутскиллям.

11-тй ЛЮКЕТ

¹Висе вылэм Вифания гуртысь Лазарь, – самой со гуртысь, кытын уло вылэм солэн Марияен Марфа апаен-сузэръёсыз. ²Мария – самой со, кин Кузё-Инмарез миро вёйын зыраз, Солэсь пыдъёс-сэ йырсиеныз чүшиз; солэн Лазарь братэз висе вылэм. ³Сузэръёс Солы вераны ыстйллям: «Кузё-Инмар! Тани, Тон кинэ яратйськод, висе». ⁴Тае кылыса Иисус шуэм: «Та висён кулонлы өвёл, со Инмарез данъян понна, со пыр Инмар Пи данэ потоз». ⁵Нош Иисус яратэ вылэм Марфаез но, солэсь сузэрзэ но, Лазарез но. ⁶Со висе шуыса кылэм бераз, со интыяз эшшо кык нунал улэм на. ⁷Та бере дышетскисьёсызлы шуэм: «Нош ик Иудеяе мыноме». ⁸Дышетскисьёсыз Солы шуиллям: «Равви! Кемаласен-а ини Тонэ иудейёс изэн зйръяса виыны медо вал, Тон нош ик отчы мынйськод?» ⁹Иисус ответ сётэм: «Нуналын дас кык час өвёл-а? Кин нуназе ветлэ, со уг канжаськылы, малы ке шуоно, та дуннелэсь югытсэ адже. ¹⁰Нош кин уин ветлэ, со канжаськылэ, малы ке шуоно, со дорын югыт өвёл». ¹¹Тае верам бераз, соослы шуэм: «Асьмелэн эшмы Лазарь умме усем, Мон сое сайкатыны мынйсько». ¹²Дышетскисьёсыз шуиллям: «Кузё-Инмар! Умме усем ке, бурмоз ай». ¹³Иисус солэн кулонэз сярысь верам; нош соос малпаллям, Со огшоры изён сярысь вера шуыса. ¹⁴Соку Иисус соослы шонерак верам: «Лазарь кулйз. ¹⁵Мон тй понна шумпотйсько: Мон отын ой вал, табере тй мед оскоды; нош али со доры

мыноме». ¹⁶Соку Кыкто шуон Фома дышетскись-ёслы шуэм: «Мыноме, асьмеос но Соин валче куломе».

¹⁷Лыктыса Иисус тодэм, со ньыль нунал шайгуын ини шуыса. ¹⁸Вифания Иерусалимлы матын, ог куинь иськемын вылэм. ¹⁹Иудейёс пöлысь тросэз Марфаен Мария доры – братсы понна соосты буйгатыны лыктйллям. ²⁰Иисус лыктэ шуыса кылэм но, Марфа Солэн пумитаз потэм; нош Мария корказ кылем. ²¹Соку Марфа Иисуслы шуэм: «Кузё-Инмаре! Тон татын луысалыд ке, мынам братэ öй кулысал. ²²Но али но тодйсько: Тон Инмарлэсь мае ке курид ке, Инмар Тыныд сётоз». ²³Иисус солы шуэм: «Тынад братэд улзыса султоз». ²⁴Марфа Солы шуэм: «Тодйсько, берпум нуналэ, улзыса султон дырря, улзыса султоз шуыса». ²⁵Иисус солы шуэм: «Мон – улзыса султон но улон. Мыным оскись кулйз ке но, улоз. ²⁶Котькудйз ик улйсь но Мыным оскись мурт ноку но уз кулы. Талы оскиськод-а?» ²⁷Со Солы шуэм: «Бен, Кузё-Инмаре! Мон оскисько, Тон Инмар Пи Христос шуыса, Кудйз кулэ вал дуннее лыктыны».

²⁸Тае верам бераз мынэм но аслэсьтыз сузэрзэ Марияез лушкемен öтьыса шуэм: «Дышетйсь татын, тонэ öте». ²⁹Кылэм бераз ик, жогак султэм но Со доры мынэм. ³⁰Иисус гуртэ уг на пыры вылэм, Марфалэн пумитам интыяз ик сылэ вылэм. ³¹Коркан Марияез буйгатыса улэм иудейёс аджиллям, кызыы Мария жогак султыса потйз. Соос со бöрсый мынйллям, малпаллям, со шайгу дуре бöрдыны мынйз шуыса. ³²Нош Мария, Иисус

доры лыктэм, Сое адзыса, пыд выжыяз уськытс-кем но шуэм: «Кузё-Инмаре! Тон татын луысалыд ке, мынам братэ ой кулысал». ³³Иисус солэсь но соин ёош лыктэм иудейёслэсь бёрдыса улэмзэс адзыса, Ачиз но жоже усем, пушкыз тырем но ³⁴шуэм: «Кытчы тй сое понйды?» Солы шуиллям: «Кузё-Инмар! Мын но учкы». ³⁵Иисуслэн синкы-лиосыз потйллям. ³⁶Соку иудейёс вераськиллям: «Учкы ай, макем Со сое яратэ вылэм!» ³⁷Соос пöлысь куд-огез шуиллям: «Та – синтэмлэсь синзэ усьтйсь, Лазарь но медаз кулы вал шуыса, лэсь-тыны өз быгаты-а?»

³⁸Иисус, нош ик пушкыз тырыса, шайгу доры лыктэм. Со пещера вылэм, со азын из кылле вылэм. ³⁹Иисус шуэм: «Басьтэлэ изээ». Кулэм муртлэн сузэрез Марфа Солы шуэм: «Кузё-Инмаре! Зыныз потэ ини; ньыль нунал уго ини, кызы со шайгуын кылле». ⁴⁰Иисус солы шуэм: «Ой вера-а Мон тыныд, оскид ке, Инмарлэсь пиштйсь данлыксэ адзод шуыса?» ⁴¹Кулэм мурт кыллэн пещера азысь изээ кымалтйллям. Иисус, синьёссэ инме жутыса, шуэм: «Атае! Монэ кылэмед понна, Тыныд тау карисько. ⁴²Мон тодйсько, Тон Монэ котьку но кылод шуыса; нош тае верай татын сылйсь калык понна, мед оскозы, Тон Монэ ыстйд шуыса». ⁴³Тае верам бераз, Со бадзым куараен вазиськем: «Лазарь! Пот отысь». ⁴⁴Кулэм мурт потэм, китйз но, пыдтйз но кулэм мурт ватон шобырен бинямын, ымнырыз кышетэн думемын вылэм. Иисус соослы шуэм: «Пертчылэ сое, мед мыноз».

⁴⁵Соку Мария доры лыктэм иудейёс пöлысь тросэз, Иисуслэсь мар лэсьтэмзэ адзыса, Солы оскыны кутскиллям. ⁴⁶Нош соос пöлысь куд-огез фарисейёс доры мынйллям но вераллям, мар лэсьтйз Иисус. ⁴⁷Соку архиерейёс но фарисейёс кенеш люкаллям но шуиллям: «Асьмелы мар кароно? Та Адями трос паймымон ужъёс лэсьтэ. ⁴⁸Сое озыы гинэ кельтймы ке, ваньмыз Солы оскыны кутскозы, – соку Рим адямиос лыктозы но интымес но, калыкмес но киултозы». ⁴⁹Нош соос пöлысь одйгез, Каиафа, со арлы архиерей луэм мурт, соослы шуэм: «Тй номыр но уд тодйське, ⁵⁰уд но малпаське, быдэс калык бырытозь, асьмелы умойгес луоз, адямиос понна одйг мурт кулйз ке». ⁵¹Со ас малпанзэ верамтэ, но со арлы архиерей луэменыз Инмарлэн сётэм дэлетэныз азыпалзэ тодытыса верам, Иисус калыкез утён понна кулоз шуыса. ⁵²Калык понна гинэ öвöl, пазьгиськем Инмар нылпиосты но огазе люкан понна, Со кулоз. ⁵³Та нуналысен Сое виыны кариськиллям.

⁵⁴Соин ик Иисус иудейёс пöлтй шара ветлымтэ ини. Со отысь кыр дунне вöзысь шаере кошкем, Ефраим шуон городэ. Отын Со Аслаз дышетекисьёсыныз улэм.

⁵⁵Матэ вуэм ини иудейёслэн Быдзымнуналзы. Быдзымнунал азыын чылкытатскон понна тросэз Иерусалиме лыктйллям. ⁵⁶Соос Иисусэз утчаллям, храмын сылыкузы, ог-огзылы шуиллям: «Кызы тй малпаськоды? Уз лыкты-а Со празднике?» ⁵⁷Архиерейёс но фарисейёс косон сётйллям: Солэсь

⁴⁵Соку Мария доры лыктэм иудейёс пöлысь тросэз, Иисуслэсь мар лэсьтэмзэ адзыса, Солы оскыны кутскиллям. ⁴⁶Нош соос пöлысь куд-огез фарисейёс доры мынйллям но вераллям, мар лэсьтйз Иисус. ⁴⁷Соку архиерейёс но фарисейёс кенеш люкаллям но шуиллям: «Асьмелы мар кароно? Та Адями трос паймымон ужъёс лэсьтэ. ⁴⁸Сое озьы гинэ кельтймы ке, ваньмыз Солы оскыны кутскозы, – соку Рим адямиос лыктозы но интымес но, калыкмес но киултозы». ⁴⁹Нош соос пöлысь одйгез, Каиафа, со арлы архиерей луэм мурт, соослы шуэм: «Тй номыр но уд тодйське, ⁵⁰уд но малпаське, быдэс калык бырытозь, асьмелы умойгес луоз, адямиос понна одйг мурт кулйз ке». ⁵¹Со ас малпанзэ верамтэ, но со арлы архиерей луэменыз Инмарлэн сётэм дэлетэныз азыпалзэ тодытыса верам, Иисус калыкез утён понна кулоз шуыса. ⁵²Калык понна гинэ öвöl, пазьгиськем Инмар нылпиосты но огазе люкан понна, Со кулоз. ⁵³Та нуналысен Сое виыны кариськиллям.

⁵⁴Соин ик Иисус иудейёс пöлтй шара ветлымтэ ини. Со отысь кыр дунне вöзысь шаере кошкем, Ефраим шуон городэ. Отын Со Аслаз дышетекисьёсыныз улэм.

⁵⁵Матэ вуэм ини иудейёслэн Быдзымнуналзы. Быдзымнунал азын чылкытатскон понна тросэз Иерусалиме лыктйллям. ⁵⁶Соос Иисусэз утчаллям, храмын сылыкузы, ог-огзылы шуиллям: «Кызы тй малпаськоды? Уз лыкты-а Со празднике?» ⁵⁷Архиерейёс но фарисейёс косон сётйллям: Солэсь

кытын луонзэ кин ке тодйз ке, мед ялоз – Сое кутыны луон вылысь.

12-тй ЛЮКЕТ

¹Быдзымнуналлэсь куать нунал азьло Иисус Вифание лыктэм, кытын улэм Лазарь – Солэн кулэмысь улзытыса султытэм муртэз. ²Солы отын жытан дасяллям. Марфа юрттйськыса улэм, нош Лазарь, Соин валче куноос пöлын пукем. ³Мария, фунт* мында нардлэсь чылкыт дуно мироез басьтыса, Иисуслэсь пыдзэ зырам. Солэсь пыдйессэ йырсиосыныз чүшылэм; быдэс корка пушказы миролэн ческыт зыныз лöсьяськем. ⁴Соку Искарот Симон пи Иуда, Солэн дышетскисьёсыз пöлысь одйгез, кудйз Сое кутыса сётоно вылэм, шуэм: ⁵«Малы та мироез куинь сю динариен вузантэмез но кураськисьёслы сёткантэмез вал?» ⁶Тае со кураськисьёс сярысь сьулмаськемынз верамтэ, малы ке шуоно, со ачиз лушкаськись вылэм: солэн бордаз коньдон ящикез вылэм, – нуллэм, мар отчы лэзьылллям. ⁷Нош Иисус шуэм: «Кельтэ сое; Монэ ватон нуналлы со тае возем. ⁸Кураськисьёс ялан тй котырын уго, нош Мон – ялан öвöl».

⁹Иудейёс пöлысь тросэз тодйллям Со отын шуыса, но Иисусэз адзон понна гинэ öвöl, кулэмысь улзытыса султытэм Лазарез но адзон понна лыктйллям. ¹⁰Архиерейёс Лазарез но виыны верась-

* 12:3 Вашкала римлянйёслэн одйг фунтсы тупа вал ог 330 граммлы.

киллям, ¹¹малы ке шуоно, иудейёе пöлысь тросэз соин сэрэн лыктйллям но Иисуселы оскыны кутекиллям.

¹²Мукет нуналаз празднике лыктэм трос адямнос, Иисус Иерусалиме лыктэ шуыса, кылйллям но, ¹³пальма вайёс кутыса, Солэн пумитаз потыса черекъяллям:

«Осанна!

Кузё-Инмарлэн нимыныз лыктйсь дано,

Израильлэн Эксез!»*

¹⁴Нош Иисус, пинал ишакез шедьтыса, со вылэ пуксем, кызыы гожтэмын:

¹⁵«Сйонлэн нылыз, эн кышка!

Тани тынад Эксэд лыктоз,

пинал ишак вылэ пуксьыса».*

¹⁶Солэн дышетскисьёсыз нырысь тае валаллямтэ вылэм, нош Иисус данэ потэм бере, соку Со сярысь тазыы гожтйськемын вал шуыса, но мар Со лы лэсьтйзы, тодазы ваиллям. ¹⁷Соин огазын луэм калык шара ивортэм, Со Лазарез шайгуысь öтыса поттйз, сое кулэмысь улзытыса султытйз шуыса. ¹⁸Солэсь та паймымон ужез лэсьтэмзэ кылыса уго, калык Сое тазыы пумитам. ¹⁹Нош фарисейёс куспазы вераськиллям: «Адзиськоды-а, номыр но карыса уд вуйське? Быдэс дунне Со сьöрымынэ».

²⁰Праздник дырря йыбырттыны лыктэмьёс пöлын кöня ке еллиньёс но вылэм. ²¹Соос лыктйллям

* 12:13 Пс. 117:25-26.

* 12:15 Зах. 9:9.

Галилеяысь, Вифсаида карысь потэм Филипп до-
ры но куриллям сое тазы шуыса: «Кузё! Милям
Иисусэз адземмы потэ». ²²Филипп мынэм но
Андрейлы верам, нош собере Андреен Филипп
Иисуслы вераллям. ²³Иисус соослы ответ сётыса
шуэм: «Адями Пилы данэ потыны час вуиз. ²⁴Зэм
ик, зэм ик тйледлы верасько: чабей кидыс му вылэ
усьыса өз ке кулы, соку огназ кыле; нош кулэ ке,
соку трос емыш вае. ²⁵Аслэсьтыз лулзэ яратйсь
мурт быдтоз сое; нош та дуннеын аслэсьтыз лулзэ
адземпотостэм карись мурт, быронтэм улонлы
сое утёз. ²⁶Кин Мыным ужа, Мон сьёры мед мы-
ноз; кытын Мон, отын ик Мынам медое но луоз;
кин Мыным ужа, сое Мынам Атае сйлы кароз.

²⁷Табере Мынам лулы бугырскиз; мар Мыным
верано? Атае! Мозмыты Монэ та часлэсь! Но Мон
та час понна ик лыктй уго. ²⁸Атае! Аслэсьтыд ним-
дэ данъя». Соку Инмысь куара лыктэм: «Данъяй
ни, но эшшо но данъяло на». ²⁹Татын сьлйсьёс
но та куараез кылэм калык шуиллям: «Та гудыри».
Нош мукетъёсыз шуиллям: «Солы кылчин вераз».
³⁰Та пумысен Иисус шуэм: «Та куара Мон понна
ёй вал, калык понна вал. ³¹Туннэ та дуннелы суд
вуиз; табере та дуннелэн эксез педло пала улляса
лэземын луоз. ³²Нош куке Мон музъем вылысь
жутэмын луо, ваньзэс Ас бордам кыско». ³³Тае
Со кыче кулонэн кулонзэ мед тодозы шуыса верам
вылэм. ³⁴Калык Солы ответ сётэм: «Ми законысь
кылймы, Христос пумтэм дауръёс улэ шуыса; нош
Тон малы Адями Пилы жутйськемын луыны кулэ
шуыса вераськод? Кин Со Адями Пи?» ³⁵Соку

Иисус соослы шуэм: «Эшшо өжыт дырлы тй бордын югыт вань на; тйледыз пеймыт медаз жокаты шуыса, ветлэ югыт вань на дырья; пеймытын ветлйсь уг тоды уго кытчы мынэмзэ. ³⁶Югыт тйледын дырья, югытлы оскелэ, югытлэн нылпиосыз мед луоды».

Тае верам бераз, Иисус кошкем, соослэсь ватйськем. ³⁷Соос азын сыће трос паймымон ужъёс лэсьтэм, нош соос Солы оскиллямтэ. ³⁸Исаия пророклэн верам кылыз мед быдэсмоз:

«Кузё-Инмаре! Милесьтым кылэмлы кин оскиз? Кузё-Инмарлэн кужымез кин азын усътйськиз?»*

³⁹Малы соос оскыны быгатйллямтэ, со пумысен эшшо Исаия вераз вал:

⁴⁰«Инмар синъёссэс адзисьтэм кариз,
сюлэмзэс измытйз;
синмынызы медаз адже,
сюлмынызы медаз валалэ,
Мон мед бурмытом шуыса
медаз но берытске».*

⁴¹Исаия тае верам, Солэсь пиштйсь данлыксэ адзем бераз; тае со Иисус сярись верам. ⁴²Кузёйыръёс пöльсь но тросэз Солы оскыны кутскиллям, но фарисейёсын сэрен, синагогалэсь люкемын медаз луэ шуыса, оскемзэс ватыса возиллям.

⁴³Инмар дорысь потйсь данэз сярись, адямиослэсь данъямзэс юнгес яратйллям уго.

* 12:38 Ис. 53:1.

* 12:40 Ис. 6:10.

⁴⁴Иисус нош бадзым куаразэ поттэм но шуэм: «Мыным оскись Мыным уг оскы, со Монэ Ыстйсьлы оске. ⁴⁵Монэ адзись, Монэ Ыстйсьез адзе. ⁴⁶Мон – югыт сётйсь, нокин но Мыным оскись пеймытэ медаз кылы шуыса дуннее лыктй. ⁴⁷Кин Мынэсьтым кыльёсме кылйз но өз ке оскы, Мон сое судить уг кариськы: уго Мон дуннеез судить карыны ой лыкты, дуннеез утыны Мон лыктй. ⁴⁸Монэ кулэтэм карись но Мынэсьтым кыльёсме кабыл бастйсьтэмлэн аслаз судьяез вань: Мынам верам кылы берпум нуналэ сое судить кароз. ⁴⁹Уго Мон Аслэсьтым ой вера, – Монэ ыстэм Атае, Со Мыным курон-косон сётйз, мар шуыны но, мар вераны но. ⁵⁰Мон тодйсько, Солэн курон-косонэз быронтэм улон луэ шуыса. Озыен, Мон мар верасько, верасько сое, мае Мыным Атае вераны косйз».

13-тй ЛЮКЕТ

¹Быдзымнунал праздник азын Иисус, дуннеысь Атаез доры кошкон часэзлэсь вуэмзэ тодыса, та дуннеысь Аслэсьтызъёссэ яратыса, пумозяз соосты яратэмзэ уж вылын возьматэм. ²Жытан дыръя, кукке дьявол Искарот Симон пи Иудалы Сое кутыса сётонэз сюлмаз понэм вылэм ини, ³Иисус, Атаезлэсь Солы ваньзэ кияз сётэмзэ, Аслэсьтыз Инмар дорысь потэмзэ но Инмар доры кошкемзэ но тодыса, ⁴жытанысен султэм, дйсьянзэ кылем но, чүшкон бастыса, куссэ думем. ⁵Собере мись-

тйськонэ ву лэзем но дышетскисьёсызлэсь пыдъёссэс миськыны, куссэ думем чюшконэн чюшылыны кутскем. ⁶Симон Петр доры лыктэм, нош Петр Солы шуэм: «Кузё-Инмаре! Тон-а мынэсьтым пыдъёсме миськод?» ⁷Иисус солы ответ сётыса шуэм: «Мар Мон лэсьтйсько, али тон уд тодйськы, нош берло валалод». ⁸Петр Солы шуэм: «Даурад но пыдъёсме уд миськы». Иисус солы ответ сётэм: «Ой ке миськы, озьыен, тынад Монэн артэ интыед өвёл». ⁹Симон Петр Солы шуэм: «Кузё-Инмаре! Пыдъёсме гинэ өвёл, суйёсме но, йырме но миськы». ¹⁰Иисус солы шуэм: «Чылкыт муртлэсь пыдзэ гинэ миськыны кулэ, малы ке шуоно, солэн мугорыз чылкыт; тй чылкытэсь, но ваньды өвёл». ¹¹Уго Со тодэ вылэм Аслэсьтыз кутыса сётйсьсэ, соин ик шуэм: «Ваньды ик тй чылкыт өвёл».

¹²Пыдъёссэс миськем бераз дйсьскем но нош ик Ас интыяз лыктэм, соослы шуэм: «Тодйськоды-а, мар Мон тйледлы лэсьтй? ¹³Тй Монэ Дышетйсь, Кузё-Инмар шуыса нимаськоды, – шонер вераськоды, зэмзэ но, Мон со. ¹⁴Озьыен, Мон, Кузё-Инмар, Дышетйсь, тйлэсьтыд пыддэс миськи ке, тй но ог-огдылэсь пыддэс миськыны кулэ: ¹⁵Мон тйледлы адзем карон возматй, Мон мар тйледлы кари, тй но сое ик мед кароды шуыса. ¹⁶Зэм ик, зэм ик тйледлы верасько: ляльчи ас кузёезлэсь бадзым өвёл, ыстэм мурт но сое ыстйсьлэсь бадзым өвёл. ¹⁷Тае тодйськоды ке, сое быдэсьяськоды ке, тй шудоесь. ¹⁸Ваньды сярись уг вераськы: Мон тодйсько кудъёссэ бырйи. Нош Гожтэм мед быдэсмоз: ”Монэн валче нянь сиись

Мон вылэ пыдтышсэ жутйз”.¹⁹ Али, со быдэс мем-лэсь азъвыл, тйледлы верасько: со быдэс мем бере, Со – Мон шуыса тй мед оскоды.²⁰ Зэм ик, зэм ик тйледлы верасько: Мынэсьтым лэзем муртме кабыл басьтйсь, Монэ кабыл басьтэ; нош Монэ кабыл басьтйсь мурт, Монэ Ыстйсез кабыл басьтэ».

²¹Тае верам но, Иисус духеныз бугырскыса шара ивортэм: «Зэм ик, зэм ик тйледлы верасько: тй пöлысь одйгез Монэ кутыса сётоз». ²²Кин сярысь Солэсь верамзэ валатэк, дышетскисьёсыз соку огзы шоры огзы учкылйллям. ²³Иисуслэн одйгез, яратоноез дышетскисез, Солэн вöзаз пукем. ²⁴Симон Петр солы тодмет лэсьтыса шуэм: ”Юа, кин со, кин сярысь Со вера?” ²⁵Со, Иисуслэн гадь вылаз мыкыртйськыса, Солы шуэм: «Кузё-Ин-маре! Кин со?» ²⁶Иисус ответ сётэм: «Кинлы Мон та нянь тйялтэтэз веттыса сёто, со ачиз». Тйялтэтэсэ веттыса, Искарот Симон пи Иудалы сётэм. ²⁷Та тйялтэт бере, Иуда пушкы шайтан пырем. Соку Иисус солы шуэм: «Мар лэсьтйськод ке, лэсьты жоггес». ²⁸Марлы тае Иисус солы верам, сиськисьёс пöлысь нокин но валамтэ. ²⁹Иудалэн кияз коньдон ящик возиське бере, куд-огъёсыз, Иисус сое праздниклы асьмелы мар кулэ басьтыны яке кураськисьёслы мар ке но сётыны косэ, дыр, шуыса малпаллям. ³⁰Иуда со тйялтэтэз басьтэм но соку ик отысь потэм. Уй вылэм ни.

³¹Иуда потэм бере, Иисус шуэм: «Туннэ Адами Пи данэ потйз, Со пыр Инмар данэ потйз. ³²Со пыр Инмар данэ потйз ке, Инмар но Сое Ачиз

пыр данэ поттоз, жоген Сое данэ поттоз. ³³Нылпиос! Мыным тйледын валче кема улоно өвөл ни. Монэ утчалоды, кызыы Мон иудейёслы верай ни: "кытчы Мон мынйсько, тйляд отчы лыктэмды уз луы", али но тйледлы озыы ик верасько. ³⁴Тйледлы выль курон-косон сётйсько: огдэс огды яратэ; кызыы Мон тйледыз яратй, озыы ик тй но огдэс огды мед яратоды. ³⁵Куспады яратонды луиз ке, тй Мынам дышетскисьёсы шуыса тйледыз ваньмыз тодмалозы».

³⁶Симон Петр Солы шуэм: «Кузё-Инмаре! Кытчы Тон мынйськод?» Иисус солы ответ сётэм: «Кытчы Мон мынйсько, тынад али Мон сьёры мынэмед уг луы, нош бёрысь Мон сьёры мынод». ³⁷Петр Солы шуэм: «Кузё-Инмаре! Малы али мынам Тон сьёры мынэме уг луы? Тон понна мон аслэсьтым лулме сёто». ³⁸Иисус солы ответ сётэм: «Аслэсьтыд лулдэ Мон понна сётод? Зэм ик, зэм ик тыныд верасько: атас чортытозь куинь пол Мынэсьтым куштйськод».

14-тй ЛЮКЕТ

¹«Тйляд сьолэмды жоже медаз усьы; Инмарлы оскыса, Мыным оскыса улэ. ²Мынам Атаелэн юртаз трос улон интыез; озыы ке ой луысал, Мон тйледлы шуысал: "Мон тйледлы инты дасяны мынйсько". ³Нош мыныса тйледлы инты дасяй ке, берен лыкто но тйледыз Ас дорам басьто, – кытын Мон, тй но отын мед луоды. ⁴Нош Мон

кытчы мынйсько, тй тодйськоды, сюресэз но то-
дйськоды». ⁵Фома Солы шуэм: «Кузё-Инмаре! Ум
тодйське, кытчы мынйськод; сюресэз но кызы
тодыны быгатйськомы?» ⁶Иисус солы шуэм: «Мон
– сюрес но, зэмлык но, улон но; Мон пыр сяна
нокин но Атай доры уг лыкты. ⁷Тй Монэ тодысал-
ды ке, Мынэсьтым Атайме но тодысалды; та ды-
рысен Сое тодйськоды, Сое адзиды но». ⁸Филипп
Солы шуэм: «Кузё-Инмаре! Милемлы Атаез возь-
маты, со милемлы тырмысал». ⁹Иисус солы шуэм:
«Со мында дыр чоже ни Мон тйледын, нош тон
Монэ уд тодйськы-а, Филипп? Монэ адзись мурт
Атаез адзиз. Кызы тон озы шуиськод: ”Милем-
лы Атаез возьматы?” ¹⁰Тон уд оскиськы шат, Мон
Атай бордын, нош Атай Мон бордын шуыса? Тй-
ледлы та верам кыльёсме Мон Ас бордысьтым
уг вераськы; Мон бордын улйсь Атай, Со ужьёсыз
лэсьтэ. ¹¹Оске Мыным, Мон Атай бордын, нош
Атай Мон бордын шуыса. Озы ке өвөл, ужьёсыя
Мыным оске. ¹²Зэм ик, зэм ик тйледлы верасько:
Мыным оскись мурт, ужьёсты, кудьёссэ Мон лэсь-
тйсько, со но лэсьтоз, соослэсь но бадзымзэгес
лэсьтоз; малы ке шуоно, Мон Аслам Атае доры
мынйсько. ¹³Мынам нимыным Атайлэсь мар гинэ
уд куре, ваньзэ сое быдэсто. Озы, Пи пыр Атай
данэ мед потоз. ¹⁴Мынам нимыным мар гинэ уд
куре, ваньзэ Мон быдэсто.

¹⁵Монэ яратйськоды ке, Мынэсьтым курон-ко-
соньёсме быдэсьялэ. ¹⁶Мон Атаелэсь куро но, тй-
ледлы мукет Буйгатйсьсез сётоз, Со пумтэм даурьёс
чоже тйледын валче улоз, – ¹⁷Зэмлыккэсь Духсэ,

Кудзэ дунне кабыл басьтыны уг быгаты, малы ке шуоно, Сое уг адзы, Сое уг но тоды; нош тй Сое тодйськоды, уго Со тйледын улэ, тй бордын ик улоз но. ¹⁸Тйледыз сирота уг кельты; тй доры лыкто. ¹⁹Кема ик өвөл ни, дунне Монэ уз ни адзы, нош тй Монэ адзоды, уго Мон улйсько, тй но улоды. ²⁰Со нуналэ тй тододы, Мон Аслам Атае бордын, тй Мон бордын, Мон тй бордын шуыса. ²¹Кин Мынэсьтым курон-косонъёсме кабыл басьтэ но соосты быдэсья ке, со Монэ яратэ. Нош кин Монэ яратэ, сое Мынам Атае но яратоз. Мон сое ярато но солы Ачим возматско». ²²Искариот луйсьтэмез Иуда Солы шуэм: «Кузё-Инмаре! Марта, дуннелы өвөл, милемлы Тон Астэ возматыны медйськод?» ²³Иисус солы ответ сётыса шуэм: «Кин Монэ яратэ, со Мынэсьтым кылме быдэсья; сое Мынам Атае яратоз. Ми со доры лыктомы но со доры улыны интыяськомы. ²⁴Монэ яратйсьтэм мурт, Мынэсьтым кылме уг быдэсья. Кыл, кудзэ тй кылйськоды, Мынам өвөл, со Монэ ыстйсь Атаелэн.

²⁵Тае Мон тйледлы валче улыкум верай. ²⁶Нош Буйгатйсь, Святой Дух, Кудзэ Атай Мынам нимыным ыстоз, тйледыз котьмарлы но дышетоз. Мае Мон тйледлы верай, ваньзэ тодады вайытоз. ²⁷Тйледлы каньыллык кельтйсько, Аслэсьтым каньыллыкме тйледлы сётйсько: Мон тйледлы озыы уг сётйськы, кызы дунне сётэ. Тйляд сюзлэмды жоже медаз усыы, медаз но курда. ²⁸Тй кылйды, мар Мон тйледлы верай: ”Кошкисько, но тй доры лыкто”. Тй Монэ яратысалды ке, тй шумпо-

тысалды Мынам верамелы: ”мынйсько Атае доры”. Уго Мынам Атае Мынэсьтым быдзымгес.
²⁹Быдэсমেбезлэсь азьвыл ик тае Мон тйледлы верай: та быдэсмиз ке, тй мед оскоды. ³⁰Кема өвөл ни Мыным тйледын вераськыны, уго та дуннелэн эксез лыктэ. Но солэн Монэн кузёяськыны кужымез өвөл. ³¹Дунне мед тодоз Мон Атайме яратйсько шуыса, кызы куриз-косйз Монэ Атае, озы ик лэсьтйсько: султэлэ, татысь кошкоме».

15-тй ЛЮКЕТ

¹«Мон – зэмс виноград Пуд, нош Мынам Атае – Виноград Будэтйсь. ²Мынэсьтым котькудзэ емыш сётйсьтэм вайме Со чогыса куштэ; эшшо но трогес емыш мед сётоз шуыса, котькуд емыш вайсь ваез Со сузя-вандылэ. ³Тй кыл пыр сузямын ини, кудзэ Мон тйледлы тодытй. ⁴Мон бордын улэлэ, нош Мон тй бордын уло. Кызы улвай пуд бордын өз ке улы, ас понназ аслаз емыш ваемез уз луы, тй но озы ик, Мон бордын өд ке улэ. ⁵Мон – Пуд, тй – вайёсыз. Кин Монэн улэ, Мон но со бордын улйсько, со трос емыш вае. Уго Монтэк номыр но лэсьтэмды уг луы. ⁶Кин ке Мон бордын өз улы, со улвай кадь ик педло куштэмын луоз, отын со куасьмоз; нош сыче вайёсты бичало но тыл пöлы куштыса суто. ⁷Мон бордын улйды ке, Мынам кыльёсы тй бордын улйзы ке, соку тй, мае куремды потэ, курелэ, – тйледлы сётэмын луоз. ⁸Тй трос емыш вайды ке,

Мынам дышетскисьёсы луиды ке, соин Мынам Атае данъямын луоз. ⁹Кызы Мынэ Атае яратйз, Мон но озы ик тйледыз яратй; Мынам яратонэным улэлэ. ¹⁰Мынэсьтым курон-косоньёсме быдэсьяды ке, Мынам яратонам улоды. Уго Мон но Аслам Атаелэсь курон-косоньёссэ быдэсьяй но соин ик Солэн яратоназ улйсько.

¹¹Тае Мон тйледлы соин верай: Мынам шумпотонэ тй бордын мед улоз, тйляд шумпотонды пачыласа мед улоз. ¹²Яратэлэ огдэс огды, кызы Мынэ тйледыз яратй, – та луэ Мынам курон-косонэ. ¹³Кин аслэсьтыз лулзэ аслаз эшьёсыз понна сётйз ке, солэсь но бадзымез яратон өвёл ни. ¹⁴Мынэсьтым курон-косоньёсме быдэсьяськоды ке, тй Мынам эшьёсы луиськоды. ¹⁵Мон тйледыз ляльчи шуыса уг ни нимаськы, уго ляльчи уг тоды, мар лэсьтэ солэн кузёез. Мон тйледыз эшьёс шуыса нимай, малы ке шуоно, тйледлы ваньзэ верай, мае Аслам Атаелэсь кылй-тодй. ¹⁶Тй Мынэ од бырье, Мон тйледыз бырйи: тй мед мыноды но емыш мед ваёды, тйляд емышты бырисьтэм мед луоз. Соку Мынам нимыным мае гинэ Атаелэсь уд куре, Со тйледлы ваньзэ сётоз». ¹⁷Тани таёе Мынам тйледлы курон-косонэ: яратэлэ огдэс огды.

¹⁸Дунне тйледыз адземпотостэм каре ке, тодэлэ: тйлесьтыд азыло Мынэ адземпотостэм кариз. ¹⁹Тй та дуннелэн адямиосыз луысалды ке, дунне тйледыз аслэсьтыззэ кадь яратысал. Тй дуннелэн өвёл бере, нош Мон тйледыз дуннеысь бырйи, соин ик дунне тйледыз адземпотостэм каре.

²⁰Годады возе Мынэсьтым тйледлы верам кылме: ляльчи аслаз кузёезлэсь бадзым өвёл. Монэ уллязы бере, тйледыз но уллялозы; Мынэсьтым кылме санэ понйзы ке, тйлесьтыдзэ но санэ понозы. ²¹Ваньзэ тае тйледлы Мынам нимылы луыса лэсьтозы, малы ке шуоно, соос Монэ Ыстйсез уг тодо. ²²Мон ой ке лыктысал но соослы ой ке верасал, соку соослэн сьöлыксы ой луысал; нош табере соослэн сьöлыкенызы шонере потэмзы уг ни луы. ²³Монэ адземпотостэм карись, Мынэсьтым Атайме но адземпотостэм каре. ²⁴Соос пöлын Мон ой ке лэсьтысал сыче ужьёсты, кудьёссэ нокин но мукетыз Мон дырозь öз лэсьты, сьöлыксы ой луысал; нош табере соос Мынэсьтым вань ужьёсме адзизы, озьы ке но, Монэ но, Мынэсьтым Атайме но адземпотостэм каризы. ²⁵Соослэн законазы гожтэм кыл: "Монэ чик юнме адземпотостэм каризы", мед быдэсмоз.

²⁶Нош Буйгатйсь лыктэм бере, Кудзэ Мон тйледлы Атае дорысь ысто, Атай дорысь потйсь зэмлыклен Духез Со Мон сярысь шара ивортоз. ²⁷Тй но Мон сярысь шара ивортоды, малы ке шуоно, кутсконысеныз ик тй Монэн огазын вал».

16-тй ЛЮКЕТ

¹«Тае Мон тйледлы визь сынаськонэ медад сюре шуыса верай. ²Тйледыз синагогаосысь уллялозы. Вуз сыче дыр, куке котькудйз тйледыз виылйсь мурт со Инмарлы служить каре шуыса малшалоз.

³Тазы лэсьтозы соин: Атаез но, Монэ но өз тодэ уго. ⁴Мон тае тйледлы соин верай, куке со дыр вуиз, тодады мед ваёды, Мон со сярись тйледлы верай вал шуыса.

Тае кутсконаз ой вера соин, – Мон тйледын валче вал. ⁵Табере Монэ Ыстйсь доры мынйсько, нош тй пöлысь нокин но Мынэсьтым уг юа: ”Кытчы мынйськод?” ⁶Тае Мон верай но, куфектонэн пачылмиз тйляд сюлэмды. ⁷Но Мон тйледлы зэмзэ верасько: Мон мынй ке, тйледлы умойгес луоз. Уго Мон ой ке мыны, Буйгатйсь тй доры уз лыкты, нош мынй ке, Сое тй доры ысто. ⁸Со лык-тйз ке, дуннелы сьöлык сярись, шонерлык сярись, суд сярись шара вералоз. ⁹Сьöлыксы сярись вералоз, уго Мыным уг оско. ¹⁰Шонерлык сярись вералоз, малы ке шуоно, Мон Атае доры мынйсько, табере Монэ уд ни адже. ¹¹Суд сярись вералоз, уго та дуннелэн эксэез судэ сётэмын.

¹²Трос на тйледлы веранэ, нош тй ваньзэ тае али тэрытыны уд быгатйське. ¹³Нош зэмлыклен Духез лыктэм бере, соку тйледыз Со котькыче но зэмлыклы дышетоз. Со Аслэсьтыз уз вера, вералоз, мае кылйз, азьпал адзон сярись тйледлы ивортоз. ¹⁴Со Монэ данэ поттоз, малы ке шуоно, Мон дорысь басьтоз но тйледлы ивортоз. ¹⁵Ваньмыз, маиз Атаелэн вань, – со Мынам. Соин Мон верай: Мон дорысь басьтоз но тйледлы ивортоз.

¹⁶Жоген тй Монэ уд ни адже, нош öжыт улыса нош ик Монэ адзоды; уго Мон Атай доры мынйсько». ¹⁷Соку дышеткисьёсыз ог-огзылы шуиллям: «Мар Со асьмелы вера: ”Жоген Монэ уд

адже, нош өжыт улыса нош ик Монэ адзоды”,
”Мон Атай доры мынйсько”?»¹⁸Озы, соос шуил-
лям: «Мар Со вера: ”Жоген”? Ум валаське мар
верамзэ». ¹⁹Солэсь юаны одъямзэс шөдыса, Иисус
соослы шуэм: «Ог-огдылэсь уд юаське-а Мынэсь-
тым верамме: ”Жоген Монэ уд ни адже, нош өжыт
улыса нош ик Монэ адзоды”?» ²⁰Зэм ик, зэм ик
тйледлы верасько: тй бөрдоды, викышьялоды,
нош дунне шумпотоз. Тй жоже усёды, нош тйляд
жожомонды шумпотонлы луоз. ²¹Нылпи вайықуз
кышномурт курадзоно луэ, малы ке шуоно, солэн
часэз вуиз. Нош кукке нылпи вае, шумпотэменыз
курадземзэ тодаз уг ни вайы, малы ке шуоно,
дунне вылэ адями вордйськиз. ²²Озы ик тйляд
но али жожомон дырды; но Мон тйледыз нош ик
адзо. Соку тйляд сюлэмды шумпотоз, тйлесьтыд
шумпотондэс нокин но уз ни басьты. ²³Со нуналэ
тй Мынэсьтым номыр сярысь но уд юалэ. Зэм
ик, зэм ик тйледлы верасько: Мынам нимыным
мае гинэ Атайлэсь уд куре, тйледлы сётоз. ²⁴Та
нуналозь Мынам нимыным тй номыр но од на
куре; тйляд шумпотонды тырмыт луон понна,
курелэ, басьтоды.

²⁵Та дырозь Мон тйледлы мадёнъёс пыр верай;
но вуоз дыр, кукке мадёнъёс пыр тйледлы уг ни
вера, шонерак иворто Атай сярысь. ²⁶Со нуналэ
Мынам нимыным курыны быгатоody. Тйледлы
верасько: соку тй понна Атайлэсь куроно уг луы.
²⁷Уго Ачиз Атай тйледыз яратэ, малы ке шуоно,
тй Монэ яратйды но Мон Инмар бордысь потй
шуыса оскиды. ²⁸Мон Атай дорысь потй но дуннее

лыкты; табере нош ик дуннеез кельтйсько но Атай доры мынйсько». ²⁹Дышетскисъёсыз Иисуслы шуиллям: «Тани Тон табере шонерак вераськод, ноқыче но мадёнъёсын уд ни вераськы. ³⁰Табере ми адзиськомы, Тон ваньзэ тодйськод но уд куляськиськы, кин ке но Тынэсьтыд мед юалоз шуыса; соин ик оскиськомы, Тон Инмар бордысь потйд шуыса». ³¹Иисус соослы ответ сётэм: «Табере оскиськоды-а? ³²Тани, час вуэ, вуиз но ини, кукетй ваньды пёртэм пальёсы пазыгиськоды, Монэ огнаме кельтоды. Нош Мон огнам өвёл, малы ке шуоно, Монэн чош Атай. ³³Мон тйледлы тае верай, Мон бордын каньыллыкты мед луоз шуыса. Дунне вылын куфектон-кайгуды луоз, но юнматске: Мон дуннеез ворми».

17-тй ЛЮКЕТ

¹Та кыльёс бере, Иисус синъёссэ Ин пала жутыса шуэм: «Атае! Часэ вуиз: Аслэсьтыд Пидэ данэ потты. Тынад Пиед но Тонэ данэ мед поттоз, ²уго Тон Солы котькыче лулмугорез Солэн ки улаз сётйд. Ваньмызлы, мар Тон Солы сётйд, Со быронтэм улон мед сётоз. ³Та быронтэм улон луэ: соос мед тодозы Тонэ, одйг гинэ зэм Инмарез, но Тонэн ыстэм Иисус Христосэз. ⁴Мон Тонэ музыем вылысен дано кари, Тынэсьтыд Мыным лэстыны сётэм уждэ быдэстй. ⁵Атай, Тон Монэ табере Ас данэныд данъя, кудйз дунне кылдэмлэсь азьвыл ик Мынам Тонэн огазын дыръям вал.

⁶Тынэсьтыд нимдэ Мон адымиослы усьтй, соосты Тон дуннеысь Мыным сётйд. Соос Тынадъёс вал, но Тон соосты Мыным сётйд. Соос Тынэсьтыд кылдэ утизы. ⁷Табере соос тодйзы ваньзэ: мае Тон Мыным сётйд, ваньмыз со Тынад луэ шуыса. ⁸Уго Тынэсьтыд Мыным сётэм кыльёстэ Мон соослы сётй, нош соос соосты кабыл басьтйзы. Зэм ик валазы, Мон Тон дорысь потй но Тон Монэ ыстйд шуыса оскизы. ⁹Мон соос понна вöсяськисько: дунне сярысь уг вöсяськиськы, но соос понна гинэ, кудъёссэ Тон Мыным сётйд – соос Тынадъёс уго. ¹⁰Ваньмыз, маи Мынам вань, со Тынад луэ, Тынад маид вань – со Мынам. Мон соос пыр данэ потй. ¹¹Мон дуннеын öвöл ни, соос дуннеын на, нош Мон Тон доры мынйсько. Святой Атае! Аслад нимыныд уть Мынам ки улам сётэм муртъёсты, – соос но Асьмеос кадь ик одйг огъя мед луозы. ¹²Соосын дунне вылын огазын улон дыръям, Тынад нимыныд Мон соосты, Тынэсьтыд Мыным сётэм муртъёстэ, утыса вози. Мон соосты ути, быронлэн пиез сяна, соос пöлысь нокудзы но öз быре. Священной Гожтэмын верам тазы быдэсмыны кулэ вал. ¹³Табере Мон Тон доры мынйсько но тае али дуннеын ульсьёслы верасько, соослэн но бордазы Мынам тыр шумпотонэ мед луоз шуыса. ¹⁴Тынэсьтыд кылдэ Мон соослы верай, нош дунне соосты адземпотостэм кариз, малы ке шуоно, соос но Мон кадь ик таизлэн дуннелэн адымиосыз öвöл. ¹⁵Соосты дуннеысь мед басьтод шуыса Мон уг вöсяськиськы, соосты уродлэсь мед утёд шуыса Мон вöсяськисько.

¹⁶Соос таизлэн дуннелэн адямиосыз өвөл, кызы Мон но дуннелэн өвөл. ¹⁷Аслад зэмлыкеныд соосты дун-сьöлыктэм кар: Тынад кылыд – зэмлык. ¹⁸Кызы Тон Монэ дуннее ыстйд, Мон но соосты дуннее ыстй. ¹⁹Соос но зэмлыкен дун-сьöлыктэм каремын мед луозы шуыса, соос понна Мон Асме сётйсько.

²⁰Соос понна гинэ уг вöсяськиськы, Мыным вань оскисьёс понна вöсяськисько, кудьёсыз соослэн кылзы пыр оскыны кутскизы. ²¹Ваньмыз одйг огья мед луозы. Кызы Тон, Атае, Мон бордын, Мон Тон бордын, соос но Асьме бордын одйг огья мед луозы, – дунне мед оскоз Тон Монэ ыстйд шуыса. ²²Тынэсьтыд Мыным сётэм данлыктэ Мон соослы сётй: одйг огья мед луозы, кызы Асьмеос одйг огья луиськомы. ²³Мон соос бордын, Тон Мон бордын. Одйг огья кариськемын мед луозы; дунне мед тодоз, Тон Монэ ыстйд но соосты Монэ кадь ик яратйд шуыса. ²⁴Атае! Мынам потэ, Тынад Мыным сётэмьёсыд, кытын Мон, соос но отын Монэн валче мед луозы вал шуыса. Тынэсьтыд Мыным сётэм пиштйсь данлыкез мед аджозы, малы ке шуоно, дунне кылдэмлэсь азьвыл ик Тон Монэ яратйд. ²⁵Шонер улйсь Атае! Дунне Тонэ өз тоды, нош Мон Тонэ тодй. Таос но Тон Монэ ыстйд шуыса тодйзы. ²⁶Мон соослы Тынэсьтыд нимдэ тодмо кари, эшшо но тодмогес каро на. Яратон, кудйныз Тон Монэ яратйд, соос бордын мед но луоз, нош Мон соос бордын».

18-тй ЛЮКЕТ

¹Тае верам бераз, Иисус Аслаз дышетскисьёсыныз ёош Кедрон ёр съёры выжем. Отын сад вылэм, отчы Со дышетскисьёсыныз ёош пырем. ²Та интыез тодэ вылэм Сое кутыса сётйсь Иуда но, малы ке шуоно, ёем дырья Иисус Аслаз дышетскисьёсыныз отчы люкаськылэм. ³Озы, Иуда солдат отрядэз но архиерейёслэсь, фарисейёслэсь медооссэс басьтыса, отчы фонарьёсын, жуась сэрегпумьёсын, ожмаськон тйрлыкэн лыктэм. ⁴Ваньзэ Соин мар луонэз тодыса, Иисус потэм но соослы шуэм: «Кинэ утчаськоды?» ⁵Солы ответ сётйллям: «Иисус Назореез». Иисус соослы шуэм: «Мон со». Соосын огазын Сое кутыса сётйсь Иуда но сылэм. ⁶Куке соослы шуэм: «Мон со», – соос берлань чигналлям но музьем вылэ уськытскиллям. ⁷Нош ик соослэсь юам: «Кинэ утчаськоды?» Соос шуиллям: «Иисус Назореез». ⁸Иисус ответ сётэм: «Мон тйледлы верай ни, Мон со шуыса. Монэ утчаськоды ке, та адямиосты лэзе, мед мынозы». ⁹Мед быдэсмоз Солэн верам кылыз: «Соос пöлысь, кудзэс Тон Мыным сётйд, Мон нокинэ но ой быдты». ¹⁰Симон Петрлэн палашез вылэм. Со палашэ поттэм но архиерейлэн ляльчиезлэсь бур пельзэ шуккыса уськытэм; со ляльчилэн нимыз Малх вылэм. ¹¹Нош Иисус Петрлы шуэм: «Палаштэ палаш тыронад пон; оло Атаелэсь Мыным сётэм чашазэ Мон медам юы-а?»

¹²Соку солдатъёс, сюрс солдатэн кивалтйсь, иудей медоос Иисусэз кутйллям но думылйллям.

¹³Собере Сое нырысь ик Анна доры нуиллям; со уго Каиафалэн варматаез вылэм, кудйз со арлы архиерейын улэм. ¹⁴Та вылэм самой со Каиафа, кудйз иудейёслы визь-кенеш сётэм, вань калык понна одйг адями кулйз ке, умойгес луоз шуыса.

¹⁵Иисус бёрсыын Симон Петрен но мукетыз дышетскись мынйллям. Таиз дышетскись архиерейлы тодмо вылэм, со Иисусэн валче архиерейлэн гидкуазяз пырем. ¹⁶Петр педлон, өс сьöрын сылэм. Собере мукетыз дышетскись, кудйз архиерейлы тодмо вылэм, потыса, өс возьмась кышномуртлы верам но Петрез ас сьöраз пыртэм. ¹⁷Соку өс возьмась ляльчи кышно Петрлы шуэм: «Тон но Та Адямилэн дышетскисез öвöл-а?» Со шуэм: «Öвöл». ¹⁸Кезыт луэмысь, со вакыт ляльчиос но медоос тылскиллям но шунскыса сылйллям. Петр но соосын огазын шунскыса сылэм.

¹⁹Архиерей Иисуслэсь дышетскисьёсыз сярись, Солэн дышетонэз сярись юам. ²⁰Иисус солы ответ сётэм: «Мон дуннелы шара верай. Мон котьку но синагогаын, храмын дышетй, кытчы котьку но иудейёс люкасько, номыре но лушкемен öй вералля. ²¹Мар Монэ юаськод? Юа кылзйсьёслэсь, мар Мон соослы верай. Тйни, соос тодо, мар Мон верай». ²²Иисус тае верам бере, одйгез матаз сылйсь медо Иисуслэн бамаз шуккем но шуэм: «Тазы-а Тон архиерейлы ответ сётйськод?» ²³Иисус солы ответ сётэм: «Мон уродзэ верай ке, шонерак вера мар уродзэ Мон верай; нош умойзэ ке верай, малы Монэ жугиськод?» ²⁴Анна, Сое думылытыса, Каиафа архиерей доры келям.

²⁵Симон Петр шунтйськыса сьлэм. Соку солы шуиллям: «Солэн дышетскисьёсыз пöлысь ик тон но öвöл-а?» Со куштйськыса шуэм: «Öвöл». ²⁶Архиерейлэн ляльчиносыз пöлысь одйгез, кудйз Петрлэн пельзэ чогыса уськытэм муртэзлэн чыжы-выжыез луэ вылэм, шуэм: «Мон тонэ садысен Соин чош öй адзы-а?» ²⁷Петр нош ик куштйськем. Со куспын ик атас чортэм.

²⁸Каиафа дорысен Иисусэз претория шуон интые нуиллям. Чукна вылэм. Быдзымнунал сиёнэз сныны саптаськонтэм вылысь, соос преторие пыриллямтэ. ²⁹Пилат соос доры потэм но шуэм: «Та Адымиез маин тй янгыше уськытйськыды?» ³⁰Солы ответ сётыса, соос шуиллям: «Со урод мурт öй ке луысал, ми Сое тон кие кутыса öм сётысалмы». ³¹Пилат соослы шуэм: «Басьтэлэ тй Сое но асьтэлэн закондыя судить каре». Иудейёс солы шуиллям: «Милемлы нокинэ но виыны лэземын öвöл». ³²Мед быдэсмоз Иисуслэн кылыз, кудзэ Со, кыче кулонэн кулонзэ мед тодозы шуыса, верам. ³³Соку Пилат нош ик преторие пырем но, Иисусэз öттыса, Солы шуэм: «Тон иудейёслэн Эксэйзы-а?» ³⁴Иисус солы ответ сётэм: «Тае тон аслэсьтыд-а вераськод, яке мукетьёсыз-а тыныд Мон сярсы веразы?» ³⁵Пилат ответ сётэм: «Мон иудей шат? Тынад калыкед но архиерейёс Тонэ мыным кутыса сетйзы. Мар Тон лэсьтйд?» ³⁶Иисус ответ сётэм: «Мынам Эксэйлыке та дуннелэсь öвöл. Мынам Эксэйлыке та дуннелэсь луысал ке, Мынам ужасьтыршисьёсы Монэ иудейёслы сётонтэм вылысь нюрьяськысалзы. Нош Мынам Эксэйлыке татысь

öвөл». ³⁷Пилат Солы шуэм: «Озъыен, Тон Эксэй?» Иисус ответ сётэм: «Тон вераськод Мон Эксэй шуыса. Зэмлык сярысь шара ивортыны Мон вордйськи, со понна ик дуннее лыктй. Котькудйз зэмлык бордын возиськись Мынэсьтым куараме кылзйське». ³⁸Пилат Солэсь юам: «Мар со зэмлык?»

Тае верам но Пилат нош ик иудейёс доры потыса шуэм: «Мон Солэсь ноқыче но янгышсэ уг шедьтйськы. ³⁹Быдзымнунал понна пытсэтысь одйгзэ мон тйледлы мед лэзём шуыса, вань ук тйляд сыче сямды. Яралоз-а тйледлы иудейёслэсь Эксэйзэс лэзи ке?» ⁴⁰Соку нош ик ваньзы черекъяны кутскиллям, шуиллям: «Сое эн лэзь, Варавваез лэзь!». Нош Варавва йырвандйсь мурт вылэм.

19-тй ЛЮКЕТ

¹Соку Пилат Иисусэз поттыса жугыны косэм. ²Тёрнпулэсь йыркерттэт пуныса, солдатъёс Солэн йыраз изыяллям. Нап горд басмалэсь шобыр дйсяллям ³но шуиллям: «Шумпот, иудейёслэн Эксэйзы!» Солэн бамаз тышкаллям. ⁴Пилат нош ик потэм но соослы шуэм: «Тани мон Сое тй доры поттйсько, но тодэ: мон Солэсь ноқыче но янгышсэ уг шедьтйськы». ⁵Соку Иисус тёрнпу йыркерттэтэн, нап горд басмалэсь вурем дйсянэн калык азе потэм. Пилат соослы шуэм: «Тани, та Аядями!» ⁶Нош архиерейёс, медоос Сое адзиллям но черекъяны кутскиллям: «Кортчога, кортчога Сое!» Пилат соослы шуэм: «Тй Сое басьтэ но кортчо-

галэ, мон Солэсь янгышсэ уг шедьтйськы». ⁷Иудейёс солы ответ сётыса шуиллям: «Милям вань законмы, нош милям законмыя Со кулыны кулэ, малы ке шуоно, со Ассэ Инмар Пи шуэ».

⁸Та кылэз кылыса, Пилат зол кышкатскем. ⁹Нош ик преторие пырем но Иисуслы шуэм: «Кытысь Тон?» Иисус солы ответ сётымтэ. ¹⁰Пилат Солы шуэм: «Мыным-а ответ уд сётйськы? Уд тодйськы шат, Тонэ кортчооганы мынам вань кужыме, Тонэ лэзыны но вань кужыме?» ¹¹Иисус ответ сэтэм: «Вылысен тыныд сэтэмын ой ке луысал, Мон вылын тынад но кычэ но кужымед ой луысал. Соин ик сьолык трогес со вылын, кин Монэ тыныд кутыса сётйз». ¹²Та дырысен Пилат Сое лэзыны амал утчам. Нош иудейёс черекьяллям: «Сое лэзид ке, тон кесарьлы эш өвөл. Котькин но ассэ эксэй карись, кесарьлы тушмон луэ».

¹³Та кылэз кылэм бераз, Пилат Иисусыз педлю поттэм но ачиз Лифостротон*, нош еврей сямен Гаввафа шуыса нимаськись суд лэсьтон интые пуксем. ¹⁴Соку Быдзымнунал азысь пятница вылэм, куатетй час. Пилат иудейёслы шуэм: «Тани – тйляд Эксэйд!» ¹⁵Нош соос черекьяны куткиллям: «Басьты, ну, кортчога Сое!» Пилат соослы шуэм: «Тйлесьтыд Эксэйдэс-а кортчогалом?» Архирейёс ответ сётйллям: «Кесарь сяна, милям мукет эксэймы өвөл». ¹⁶Соку Пилат Сое кортчооганы сэтэм.

* 19:13 Изэн вöldэм падвож (площадь).

Иисусэз кутйллям но нуиллям. ¹⁷Аслэсьтыз кироссэ нуыса, Со потэм «Кымес», еврей сямен Голгофа, шуон интые. ¹⁸Отын Сое кортчогаллям. Соин огазын мыд-мыд палаз эшшо кыксэ кортчогаллям, нош Иисусэз – шораз. ¹⁹Пилат пул вылэ гожтэм но сое кирос вылэ шуккем. Гожтэмын вылэм: «Иисус Назорей, иудейёслэн Эксэйзы». ²⁰Та пул вылэ гожтэмез иудейёс пöлысь тросэз лыдзиллям, уго Иисусэз кортчогам инты городлы кыдёкын вылымтэ. Гожтэмын вылэм еврей сямен, грек сямен, рим сямен. ²¹Нош иудей архиерейёс Пилатлы шуиллям: «Эн гожты ”иудейёслэн Эксэйзы”, гожты озьы, кызыы Со шуиз: ”Мон – иудейёслэн Эксэйзы”». ²²Пилат ответ сётэм: «Мар мон гожтй, сое гожтй».

²³Иисусэз кортчогамзы бере, солдатъёс Солэсь дйськутсэ басьтйллям но ньыль кесэгли люкиллям. Котькуд солдатлы люкет сюрем, хитон дйсьсэ но. Хитонэз вурыстэм, быдэс куэмын вылэм. ²⁴Озьы, огзылы огзы шуиллям: «Ум кесе сое, пус чöлтoме, кинлы сюрoз», – мед быдэсмoз Гожтэмысь верам:

«Мынэсьтым дйсянме куспазы люкылйзы, дйськутэ понна пус чöлтйзы».*
Солдатъёс озьы ик кариллям. ²⁵Иисуслэн кирос выжыяз сылйллям Солэн Анаез но Анаезлэн сузэрез Клеопа кышно Мария, озьы ик Магдалина Мария. ²⁶Анайзэ но татын сылйсь яратоно дышетскисьсэ адзыса, Иисус Анаезлы шуэм: «Анай!

* 19:24 Пс. 21:19.

Тани Тынад пиед». ²⁷Собере дышетскисезлы шуэм: «Тани тынад Анаед!» Та дырысен дышеткись сое дораз басьтэм.

²⁸Та бере Иисус, ваньмыз быдэсмиз ини шуыса тодэм бераз, Священной Гожтэмысь веран мед быдэсмоз, «Сюз куасьме» – шуэм. ²⁹Татын сылэ вылэм уксусэн тырмытэм сосуд. Губкаез уксусэн пычатыса, иссоп турын вылэ поныса, Солэн ымдураз ваиллям. ³⁰Уксусэз верьям бераз, Иисус шуэм: «Быдэсмиз!» Но йырзэ мыкыртэм, лулзэ сётэм (Инмарлы).

³¹Пятница вылэмысь, субботалы мугорьёсты кирос борды кельтонтэм понна (уго таиз суббота быдзым нунал вылэм), иудейёс Пилатлэсь куриллям соослэсь пыд юмыльёссэс пыргытыны но соосты кирос бордысь басьтыны. ³²Озбы, солдатъёс лыктйллям но нырысезлэсь пыд юмыльёссэ пыргытйллям, мукетызлэсь но Соин ёш кортёогаськемлэсь. ³³Нош Иисус доры лыктйллям но аджиллям, Со кулэмын ни шуыса, соин ик Солэсь пыд юмыльёссэ пыргытйллямтэ. ³⁴Солдатъёс пöлысь одйгез Солэн урдлы висказ шибодыен бышкалтэм но соку ик вирен ву вияны куткем. ³⁵Адзись мурт тае шара ивортйз, солэн ивортэмез зэм. Тй но мед оскоды, со зэмлыкез вера шуыса. ³⁶Священной Гожтэмын веран быдэсмиз: «Одйглызэ но Солэн медаз пырды». ³⁷Мукет интыын но Священной Гожтэм вера: «Кинэ бышкалтйзы – Со шоры учкозы».

³⁸Та бере Аримафеяысь Иосиф, Солэн лушкем дышетскисез, иудейёслэсь кышкаменыз, Иисуслэсь

Мугорзэ басьтыны Пилатлэсь курем. Пилат лэзем. Со мынэм но Иисуслэсь Мугорзэ басьтэм. ³⁹Озы ик лыктэм Никодим. Со Иисус доры уйёсы ветлэ вылэм; ог сю фунт* пала смирнаен алойлэсь сурет ваем. ⁴⁰Озы, Иисуслэсь Мугорзэ басьтйлям но, иудейёслэн ватон сямзыя, ческыт зыно вйёсын зыраса, дэраен биняллям. ⁴¹Сое кортчо-гам интыын сад вылэм, нош садын выль шайгу, кудаз нокин но ватэмын вылымтэ на. ⁴²Иудейёслэн пятницазы понна но шайгуэз матын вылэмысь Иисусэз отчы понйллям.

20-тй ЛЮКЕТ

¹Арнялэн нырысетй нуналаз вазь ик, эшшо пеймыт на вылэм, Магдалина Мария шайгу доры лыктэм но адзем, шайгу бордысь из палэнтэмын шуыса. ²Со Симон Петр доры бызьыса лыктэм, собере мукетыз дышетскись доры, кудзэ Иисус яратэ вылэм, но соослы шуэм: «Шайгуысь Кузё-Инмарез нуиллям, ум тодйське, кытчы Сое понйллям». ³Соку ик Петр но мукетыз дышетскись, шайгу доры мынйллям. ⁴Соос кыксы но чош бызьыса мынйллям. Мукетыз дышетскись Петр сярысь жоггес бызем, со шайгу доры нырысь вуэм. ⁵Со мыкыртйськыса учкем но, отын кыллись бинялтэм дэразэ адзем; но пушказ пырымтэ. ⁶Со бёрсы Симон Петр вуэм, шайгуэ пырем но

* 19:39 Вашкала римляньёслэн сю фунтсы тупа вал ог 30 килограммлы.

кыллись бинялтэм дэразэс адзем. ⁷Солэн йыр вылаз понэм шобретэз, бинялтэм дэраосын огазын вылымтэ, нимысьтыз биняса мукет азын кыллем. ⁸Соку пырем мукетыз, нырысь ик шайгу доры вуись дышеткись, со адзем но оскем. ⁹Соос уго ялан уг на тодо вылэм, Священной Гожтэмья Со-лы кулэмысь улзыса султоно луоз шуыса. ¹⁰Собере дышеткисьёсыз нош ик асьсэ доры берытс-киллям.

¹¹Нош Мария шайгу дорын бөрдьса сылэм. Бөр-дыкуз шайгуэ мыкыртйськыса учкем ¹²но кык кыл-чиньёсты адзем: тодьы дйськутэн, одйгез йыр дораз, нош мукетыз пыд выжыяз пукем, – Иисус-лэн Мугорызлэн кыллем бервылаз. ¹³Но соос солы шуиллям: «Кышномурт! Малы тон бөрдйськод?» Соослы Мария шуэм: «Кузё-Инмарме нуиллям, но уг тодйськы, кытчы Сое понйллям». ¹⁴Тае ве-раса, со берланяз учкем но сылйсь Иисусэз адзем; но тодмамтэ, со Иисус шуыса. ¹⁵Иисус солы шуэм: «Кышномурт! Малы тон бөрдйськод? Кинэ ут-часькод?» Та сад будэтйсь шуыса малпам но Со-лы шуэм: «Кузё! Тон Сое поттйд ке, вера мыным, кытчы тон Сое понйд, мон Сое басьто». ¹⁶Иисус солы шуэм: «Мария!» Со берыктйськыса, Со-лы шуэм: «Раввуни!» – кудйз «Дышетйсь» шуэм луэ. ¹⁷Иисус солы шуэм: «Мон борды эн йөтйськы, Мон уго Атае доры ой на жутскы. Мынам братьё-сы доры мын но соослы вера: Аслам Атае доры, тйляд Атайды доры, Аслам Инмаре доры, тйляд Инмарды доры жутскисько». ¹⁸Магдалина Мария мынэм но дышеткисьёслы ивортэм, Кузё-Ин-марез адзи шуыса, но мар солы Иисус верам.

¹⁹Та вылэм арнялэн нырысетй нуналаз жытазе. Иудейёслэсь кышкаменызы сэрэн, Солэн дышетскисьёсызлэн люкаськон корказылэн өсьёсыз тунгонамын вылэм; лыктэм Иисус, шораз султэм но соослы шуэм: «Ваньдылы каньыл мед луоз!»
²⁰Тае верам но Аслэсьтыз киоссэ (но пыдъёссэ), урдлыоссэ возматэм. Кузё-Инмарез адзыса, дышетскисьёсыз шумпотйллям. ²¹Иисус соослы кыкетй ползэ верам на: «Ваньдылы каньыл мед луоз! Кызы Монэ Атае ыстйз, Мон но тйледыз ыстйсько». ²²Тае вераса пельтэм но соослы шуэм: «Святой Духез басьтэлэ: ²³кинлэсь сьöлыкьёссэ куштоды, солэн куштйськоз; кинлэсь уд куштэ, солэн сьöлыкьёсыз кылёзы».

²⁴Нош Фома, дас кык пöлысь одйгез, Кыкто шуыса нимаськись, Иисус лыктыку, соосын ёош вылымтэ. ²⁵Мукетьёсыз дышетскисьёс солы шуиллям: «Ми Кузё-Инмарез адзимы». Соку Фома соослы шуэм: «Солэн кийсьтыз кортёог бервыл яраоссэ öй ке адзы, кортёог бервыл яраз чиньыме öй ке поны, Солэн урдлыосаз киме öй ке поны, уг оскы». ²⁶Тямыс нунал ортчыса, Солэн дышетскисьёсыз нош ик коркан вылйллям. Фома но соосын ик. Öсьёс тунгонамын дырря, Иисус лыктэм, шоразы султэм но шуэм: «Ваньдылы каньыл мед луоз!» ²⁷Собере Фомалы шуэм: «Вай татчы чиньыдэ, учкы Мынэсьтым киосме; вай кидэ, пон Мынам урдлыосам; оскисьтэм эн лу, оскись лу». ²⁸Фома Солы ответ сётыса шуэм: «Мынам Кузё-Инмаре, мынам Инмаре!» ²⁹Иисус Солы шуэм: «Тон Монэ адзид но соин ик оскид: адзытэк оскисьёс шудоесь».

³⁰Аслаз дышетскисьёсыз азын Иисус трос мукет паймымон ужъёс лэсьтэм, кудъёсыз сярысь та книгаын гожтэмын өвёл. ³¹Таиз гожтэмын со понна: тй мед оскоды Иисус – со Христос, Инмарлэн Пиез луэ шуыса. Солы оскыса, Солэн нимыз понна пумтэм улонды мед луоз.

21-тй ЛЮКЕТ

¹Та бере Иисус дышетскисьёсызлы Тивериада зарезь дурысен нош ик возматскем. Тани Со кызы возматскем: ²огазын выйллям Симон Петр но Кыкто шуон Фома, Галилеяысь Кана карысь Нафанаил, Зеведей пиос но Солэн дышетскисьёсыз пöлысь мукетъёсыз кыкез. ³Симон Петр соослы шуэм: «Чорыг кутылыны мынйсько». Солы шуиллям: «Ми но тонэн ёош мыномы». Мынйллям но пыже пырыса пуксиллям. Но со уе номыр но кутйллямтэ. ⁴Їукна зардыку, Иисус ярдурын сылэм; нош дышетскисьёсыз, со Иисус шуыса, тодмаллямтэ. ⁵Иисус соослы шуэм: «Пинальёс! Вань-а тйляд кыче ке но сиёнды?» Соос Солы шуиллям: «Өвёл». ⁶Иисус соослы шуэм: «Калтондэс пыждылэн бур палаз чöлтэ но кутоды». Чöлтйллям но туж трос чорыг сюрёмен сэрэн, калтонзэс поттэмзы ик луымтэ ни. ⁷Соку дышетскись, кудзэ Иисус яратэм, Петрлы шуэм: «Та – Кузё-Инмар». Нош Симон Петр та Кузё-Инмар шуыса кылэм бераз дйськутэныз шобырскем но зарезе тэтчем – со уго гольык вылэм. ⁸Нош

мукетъёсыз дышетскисъёс пыжен лыктйллям, – музъем дурозь кыдёкын ик вылйллямтэ, ог кык сю гырпум кемын, – чорыген калтонзэс гыж кыс-кыса ваиллям. ⁹Музъем вылэ потэм беразы, тыл-жуэз, со вылын кыллись чорыгез но нянез адзиллям. ¹⁰Иисус соослы шуэм: «Ваелэ али кутэм чорыгдэс». ¹¹Симон Петр мынэм но музъем вылэ бадзымесь чорыгъёсын тырмытэм калтонэз поттэм, сю витътон куинь чорыгез вылэм. Таёе трое чорыген тырмыса но калтон кесиськымтэ. ¹²Иисус соослы шуэм: «Лыктэлэ, нуназэ карелэ». Талэсь Кузё-Инмар луэмзэ тодыса, дышетскисъёсыз пöлысь нокудзы но, «Кин Тон?» шуыса, Солэсь юаны дйсьтйллямтэ. ¹³Иисус лыктэм, нянь басьтэм но соослы сётэм, озьы ик чорыг но сёткам. ¹⁴Кулэмысь улзыса султэм бераз, Иисуслэн Аслаз дышетскисъёсызлы возъматскемез таиз куинетй ползэ вылэм ини.

¹⁵Нуназе карыкузы, Иисус Симон Петрлы шуэм: «Иона пи Симон! Соос сярись тон Монэ золгес яратйськод-а?» Петр Солы шуэм: «Бен, Кузё-Инмаре! Тон тодйськод, мон Тонэ яратйсько шуыса». Иисус солы шуэм: «Мынэсьтым ыжпиосме возьма». ¹⁶Эшшо кыкетй ползэ солы шуэм на: «Иона пи Симон! Тон Монэ яратйськод-а?» Петр Солы шуэм: «Бен, Кузё-Инмаре! Тон тодйськод, мон Тонэ яратйсько шуыса». Иисус солы шуэм: «Мынэсьтым ыжъёсме возьма». ¹⁷Куинетй ползэ солы шуэм: «Иона пи Симон! Тон Монэ яратйськод-а?» Сое куинетй ползэ «Тон Монэ яратйськод-а» шуыса юамысь, Петр жоже усем но Солы шуэм:

«Кузё-Инмаре! Тон ваньзэ тодйськод; Тон тодйськод, мон Тонэ яратйсько шуыса». Иисус солы шуэм: «Мынэсьтым ыжъёсме возьма. ¹⁸Зэм ик, зэм ик тыныд верасько: кукке тон егит на вал, кустэ ачид думиськод но, кытчы мынэмед потэ, отчы мынйськод вал; нош пересьмид ке, кидэ жутод, мукет мурт тынэсьтыд кустэ думоз но, кытчы мынэмед уг поты, отчы нуоз». ¹⁹Тае верам Петрлэсь кыче кулонэн Инмарез дано каронзэ тодытыса. Тае верам но солы шуэм: «Мон бёрсы мын».

²⁰Петр берзэ учкем но со сьёры лыктйсь дышетскисез адзем, кудзэ Иисус яратэ вылэм, кудйз жытанысен Солэн гадь бордаз мыкыртйськыса шуэм: «Кузё-Инмаре! Кин Тонэ кутыса сётоз?» ²¹Сое адзыса, Петр Иисуслы шуэм: «Кузё-Инмаре! Нош соин мар луоз?» ²²Иисус солы шуэм: «Мынам потэ ке, Мон лыктытозь со мед улоз шуыса, тыныд маиз? Тон Мон бёрсы мын». ²³Та дышетскись уз кулы шуыса агай-выньёс пёлы кыл вёл-мем. Но Иисус солы «Уз кулы» шуымтэ, Со шуэм: «Мынам потэ ке, Мон лыктытозь со мед улоз, тыныд маиз?»

²⁴Та дышетскись та сярись шара ивортэ, со тае гожтйз. Солэн ивортэмез зэм шуыса тодйськомы.

²⁵Трос мукетсэ но Иисус лэсьтйз: со сярись пыр-поч гожтоно ке, малпасько, быдэс дунне вылэ но со гожтэм книгаосты тэрытыны ой луысал. Аминь.